

ASO GAFUA, 22 FEPUARI 2021

Na nofoia e le Fofoga Fetalai le Nofoa i le itula e 9:21 i le taeao.

Tatalo.

FOFOGA FETALAI: Ou te faasila sila atu ua amatalia Taualumaga ma Galuega a le Fono Aoao.

Ou te faaaogaina foi lenei avanoa ou te faatalofa atu ai ma le agaga faaaloalo i le paia maualuga o le Palemene i lenei taeao fou. Malo le lagi e mama, ua faamalo foi le soifua manuia, ae faapea foi le faafogaga tapuai mai a si o tatou atunu. E faapea foi Ofisa Sili o Pulega o Matagaluega ma Faalapotopotoga eseese a le Malo.

TUSI FAAMAONIA O LE TOFIGA

Na fofogaina e le Fofoga Fetalai le Tusi Faamaonia o le Tofiga.

O AU, O TUIMALEALIIFANO VAALETOA SUALAUVI II, O LE AO O LE MALO TUTOATASI O SAMOA, e tusa ai ma le Mataupu 82A o le Faavae o le Malo Tutoatasi o Samoa, (“Faavae”), i le faia i luga o le fautuaga a le Fono Aoao Faitulafono ma le faamaoniga i le FK(21)5, aso 4 Fepuari 2021, **UA OU TOFIA NEI –**

LUAMANUVAO KATALAINA SAPOLU

i le tofiga **Komesina o Sulufaiga (Ombudsman)**, mo le vaitaimi e 6 tausaga, i luga o aiaiga ua faamaoti mai lalo o le Vaega VI.A o le Faavae ma le Tulafono o Komesina o Sulufaiga (Omubudsman) 2013.

TUUINA ATU i lou nei Lima i lenei aso 19 Fepuari 2021.

Sainia: Tuimalealiifano Vaaletoa Sualauvi II
O LE AO O LE MALO.

FOFOGA FETALAI: Ia, o le tusi lena o le faamaoniga o le tofiga o le Komesina o Sulufaiga.

**TULAFONO TAU FAAOFI O LE FAATATAUINA O TUPE
FAAOPOOPO (NU.1) 2020/2021 – felafolafoaiga faaauau i luga o le
faitauga faalua – Aso 24**

FOFOGA FETALAI: E tolopo Galuega a le Fono Aoao i le aso Faraile ua tuanai o lo o saunoa le Afioga i le Minisita mo Tina ma Tamaitai.

Ia, ma le faaaloalo ou te tapa lau Afioga i le Minisita e tulai mai e faaauau le saunoaga e tusa ai o mea sa laga e sui usufono mamalu o le Palemene.

Afioga Hon TUITAMA TALALELEI TUITAMA (Minisita mo Tina ma Tamaitai, Atinae o Nuu ma Afioaga ma Agafesootai): Lau Afioga i le Fofoga Fetalai, e piamia i le taulaga ua e siitia ma ua i luma o le Atua Silisili Ese. E tatou te momoe lava ma manu ae sau mala e atiae, aua tatou te le taumasina ma le finagalo o le Atua. E gausia le moemoe, e toulu foi le lagoele. Ae a le aso? A lea ua tatou feiloi i le magafetausoifua? Ia saga faamanuia e le alofa ma le agalelei o le Atua i le tatou mafutaga i lenei aso. Faafetai i le soifua maua ma le lagi e mama i lau Afioga ma le mamalu o lenei Kapaneta.

Lau Afioga i le Fofoga Fetalai, e faamuta le tatou Fono i le aso Fono talu ai ua oo atu sa matou faamatalaga i aoaoga o lo o faagasolo a le Matagaluega i Taiala a itumalo. E te silafia lau Afioga, o lea ua manino le tulaga i Taiala ma o le a le toe oo i ai sau faamatalaga. Na pau lava o lea, ona o lea sa laga mai e nisi o sui usufono ituaiga manaoga eseese o itumalo o lo o afifi mai i totonu o Taiala nei ua uma ona faatinoina ma ua uma ona resitalaina. Ma o lea e tau lava ina ou pai atu i ai mo sina faataitaiga, o ituaiga taiala, aua e maea foi ona resitala Taiala, ona toe galulue foi lea o le Matagaluega... o isi ia o manaoga o aumai i Taiala latou te fia silafia le faatinoina o lea mea ma lea matafaioi, ma nisi foi o manaoga o latou aumaia, ona faatalanoa lea e le Matagaluega ina ia malamalamo atili le mea o i ai le tofa ma le faautautaga i afioaga ma alaalfaga ma itumalo o lo o tuuina mai a latou Taiala.

O aoaoga mo tupulaga talavou i gasegase ma faafitauli faa-soifua maloloina e mafua mai i feusuaga saogalemu pe fai faamalosi faapea foi maitaga e aafia ai fanau teine i lalo ifo o le 16 tausaga. E faapea foi le faatalanoaina o auala e fesoasoani ai i tupulaga talavou i faafitauli e fesoasoani ai i latou mafaufau ma iu ai ina faatino ni faaiuga sese, e pei o le pule i le ola.

O se tasi vaega taua o nei aoaoga, o le faatalanoa lea o auala e taofia ai le soona faaaoga le talafeagai o le ava malosi ma fualau faasaina aemaise foi o tupulaga talavou ina ia fesoasoani i le taofia ma le tafiesea o sauaga i totonu

o aiga. O ia polokalame sa faatinoina ma faatupeina e le lala o Malo Aupaatasi ia po o le United Nations Population Fund, lea sa taua o le United Nations Fund for Population Activities. O le galuega la a le Matagaluega, ia, latou te tapa ai la le tulaga lea sa taua muamua o le faiga paaga, e talosagaina ai i latou o lo o i ai le poto faapitoa mo mataupu ia o lo o manaomia mai e itumalo ona o faatasi lea, e pei la o le Soifua Maloloina, e pei o le Ofisa o Leoleo, pe a faapea o se mataupu tau le Tulafono, e faapena foi le Ofisa o le Loia Sili.

O aoaoga mo i latou o lo o feagai ma le tausiga o nai o tatou tagata i aafiaga tumau o le soifua. O i latou ia ua taua o carers, lea sa faatupeina e le Malo o Ausetalia e auala mai i le polokalame faapitoa mo i latou o lo o i ai aafiaga tumau o le soifua, po o le Samoa Disability Programme. O le tasi, o le tuuina atu lea o mea faitino, e pei o nofoa faataavaleviale (wheel chairs) ma tootoo faapitoa mo i latou e i ai aafiaga tumau o le soifua, lea sa faatalosagaina e nisi o itumalo i totonu o latou Taiala. O nei fesoasoani sa faatupeina mai i le polokalame faapitoa mo i latou e i ai aafiaga tumau, po o le Samoa Disability Programme, o lo o faatupeina e le Malo o Ausetalia.

Tolu, o aoaoga i auala e tetee atu ai i sauaga faasaga i tina ma tamaitai, e pei ona talosagaina mai e nisi o itumalo, ma sa faatupeina foi e le Malo o Ausetalia, e auala mai i le polokalame mo le atinaeina o tina ma tamaitai o Samoa po o le Samoa Women Shaping Development Programme.

O lona 4 o le tuuina atu lea o fesoasoani e tali atu ai i manaoga o Komiti a Tina e ala i laausuisui e faatino ai le tapenaina o laei mo le faatinoina o aoaoga ina ia mafai ai lava e tina latou ona faatino nai a latou pisinisi laiti mo le gaosia o laei mo se tupe maua e tausi ai fanau ma aiga. O nei aoaoga sa faatupeina mai i le polokalame a le Malo o Ausetalia mo le atinae o tina ma tamaitai o Samoa faapea foi nisi o aoaoga faatinoina e ala i le fesoasoani a le Malo o Saina.

O aoga suisui nei e faatinoina e ala i le fesoasoani a le Malo o Saina, e aofia ai le tuuina mai o laausuisui i le aofaiga tele, taaiga ie ma meafaigaluega uma e moomia mo lea aoaoga. E le gata i lea, ae sa maua foi nai alauni mo meataumafa i aso uma mo i latou o lo o aoga ai i lea taumafaiga. O alii ma tamaitai faiaoga faapitoa, e malaga sao mai lava i Saina mo le faatinoina o aoaoga. I le maea ai o le suisui, ona tuuina atu atoa loa lea faameaalofa o ia laausuisui ma meafaigaluega uma sa faaaoga mo tina ma i latou uma sa auai i le aoga e faaauau ai i se atinae a le tagata lava ia i totonu o lona ia lava aiga po o lona itumalo. Na ou faatalanoaina se tasi o faiaoga lenei faapitoa mai Saina, po o ia o se faipisinisi i Saina po o ia o se tagata faapitoa. Ia ona faamatala lea o lona ia foi amataga, e le i aoga i Saina i le suisui, na alu i Iapani i le iunivesite e aoga ai e 5 tausaga o faatino ai lana aoga, lea la na apply ai loa i le avanoa lea ua maua e sau ai i Samoa e aoao le suisui. E le o ni tagata la faapea na nofo nofo lava aoao le suisui i le fale sau ai. O i latou nei e faia aoga nei faapitoa, o tagata faapitoa ua aooga ma ua i ai le tomai

faapitoa mo ia galuega, lea ua faasoa mai i le tatou atunu u e ala foi i lenei polokalame.

O lona 5, ua faatino atinae o faatoaga laauaina mo nisi o Komiti a Tina ma Faalapotopotoga eseese i totonu o nuu ma tatou itumalo e tauala atu i le polokalame mo avanoa faigaluega mo tupulaga talavou, ia lea sa faatupeina e Faalapotopotoga eseese o Malo Aufaatasi, One United Nation Youth Employment Programme. E faapea foi le polokalame faapitoa o le Samoa Disability Programme, lea e faatupe e le Malo o Ausetalia. Sa fesoasoani foi a tatou kamupani e pei o le British Tobacco i le faatupeina o togalaauaina e tali atu ai i manaoga o nisi o itumalo ina ia uunaia taumafa paleni e ala i fualaauaina ma fualaaus faisua ina ia faalalo ai gasegase o le suka ma le toto maulaluga i nai o tatou tagata.

O le tasi fesoasoani o lea sa mafai ona tuuina atu e ala lava i Taiala nei o itumalo e tali ai i manaoga o itumalo, ua faatino foi i nisi o atinae o vaitaele, e pei ona taua o vai ia faa-natura lea e tua i ai le atunu u pe a oo i le taimi e faaletonu ai le suavai o lo o faasoaina atu i paipa ma vai foi ia e tavili. Ae o lo o i ai lava nai vaitaele lea e tua i ai le galuega, o le vai magalo, o le vai e puna ae i o tatou gataifale, ona pa lea ma faasao le vai lea e faaaogaina mo lea faamoemoe.

Ua faatino foi nisi o atinae o aoaoga mo tina ma tamaitai faapea foi tupulaga talavou i mataupu tau taitaiga po o Leadership Capacity Building Programmes, lea sa faatino e tauala atu i le Polokalame Faapitoa mo Tamaitai Taitai Samoa, or Women in Leadership Samoa, lea o lo o faatupeina e le Malo o Ausetalia.

O nisi o talosaga sa tuuina mai, o fale komiti e tapuvaetasi i ai galuega fai a komiti a tina, ia, ua maea foi ona tuuina atu tusi e lagolago ai ia talosaga i le Ofisa o le Amepasa o le Malo o Iapani, ia e faapea foi le Ofisa o le Amepasa o le Malo o Saina i Samoa nei.

O le tasi fesoasoani sa agai atu i ai le tatou Matagaluega e tusa ai manaoga o itumalo, sa tuuina atu le tusi talosaga i le Ofisa o le Malo Aufaatasi i Samoa nei mo se fesoasoani e tali ai i manaoga o nisi o itumalo mo meafaigaluega e faatino ai galuega mo le aoina ma le faamamaina o otaota ma lapisi, lapisi uga po o plastic bags ma nisi mea tau plastic o lo o toa i le taele o le aloalo o gataifale o nuu ma itumalo. Ia, o le matou itumalo e i ai le isi talosaga i le tulaga lava lea, ma o lo o talia foi se fesoasoani. E talosagaina ai vaa alamini foi ia ona faaaoga lea i ai o taulelea o le nuu e o e ao le alamea o lo o faaleagaina le amu i le gataifale ma ao le lapisi lea e le pala, lea ua faaleagaina ai o tatou gataifale ma o tatou aloalo ma afaina ai figota o lea e tua i ai le fofoga taumafa o le tatou atunu. Ia, o le faamoemoe lea o le matou itumalo faatasi ai ma isi foi itumalo, o lo o i ai le lagona lea e fia faamamaina le tatou siosiomaga e ala i le aoina o lapisi ia o lo o faaleagaina ai o tatou gataifale.

Lau Afioga i le Fofoga Fetalai, ona ou oo mai ai lea i faiga faapaaga. E pei ona saunoa nisi o sui usufono, e ui ina o lea e le o auai mai le tasi o sui usufono sa saunoa i lea tulaga, le Afioga i le sui usufono mo Lotofaga, ma faasea i le lē aliali o faiga faapaaga moni mo nisi o Faalapotopotoga Tumaoti. Ae ou te tautino atu ma le faamaoni, o le tasi lena o manulauti tulituliloa a lenei Matagaluega, o le galulue faatasi lea ma paaga aemaise ai Faalapotopotoga Tumaoti. O le galuega sa faatino mo le misela ma le polokalame faalauliloa o le Koviti-19, sa valaaulia faapitoa e le Matagaluega nisi o Faalapotopotoga Tumaoti e pei o le Nuanua o le Alofa, Faataua le Ola, Faalapotopotoga o le Soifua Manuia o Fanau po o le Samoa Family Health Association, Samoa Victim Support, Lala o le Faalapotopotoga o Soifua Maloloina o le Lalolagi le WHO, faapea le Matagaluega o Leoleo ma le Matagaluega o le Soifua Maloloina, ina ia auai faatasi i taumafaiga sa taimua ai lenei Matagaluega. Sa faapea foi ona tuuina atu nai seleni i Faalapotopotoga Tumaoti e fesoasoani ai i a latou galuega fai, aemaise ai o le auai mai o latou sui i polokalame a le Matagaluega, e aofia ai foi ma le Cancer Society.

O le taimi nei, o lo o faagasolo le polokalame faale-aoaoga i nuu ma afioaga i auala e tetee atu ai i sauaga mataga i tina ma tamaitai, faapea fanau ma i latou e i ai aafiaga tumau o le soifua. O lo o auai foi Faalapotopotoga Tumaoti e pei o le Faatuatua le Ola, Faalapotopotoga o le Autau o le Faaolataga po o le Salvation Army, faapea le Matagaluega o Leoleo, Matagaluega o Faamasinoga, Matagaluega o Pisini, Alamanuia ma Leipa. E i ai foi nisi o polokalame a le Matagaluega nei sa galulue faatasi ai ma le Faalapotopotoga o le Kanesa i Samoa. Ma faapea foi ona maua ai nai seleni mo le Faalapotopotoga e tusa o lo latou auai mai.

E fia faailoa atu foi, sa mafai ona auai le Ofisa Sili o le Pulega o le Matagaluega lenei i le lotu faamanatu a le Faalapotopotoga a le Kanesa i Samoa e pei ona taua e le sui usufono mai Lotofaga. O lo o matou galulue faatasi foi ma isi Faalapotopotoga Tumaoti i lalo o le Polokalame Faapitoa o i latou e i ai aafiaga tumau o le soifua, lea o lo o faatupeina e le Malo o Ausetalia, po o le Samoa Disability Parntership Programme. O nei Faalapotopotoga, e aofia ai le Nuanua o le Alofa, Faalapotopotoga o le Toomaga mo e Puapuagatia - Samoa Victim Support, Faalapotopotoga o Tina Faipisinisi – Women in Business Development, Koshen Trust, Faalapotopotoga Fesoasoani mo i latou e i ai gasegase o le mafaufau, Faalapotopotoga o le Soul Talk, Faalapotopotoga o le Samoa Spinal Network, Samoa Association of Sign Language and Interpreters, Samoa Blind Persons Association, Faalapotopotoga o i latou e Logonoa – Death Association, Aoga o le Loto Taumafai, Special Olympics of Samoa, Aoga o le Fia Malamalama, Aoga o le Senese ma isi. O lo o maua ai foi fesoasoani tau tupe mo ia Faalapotopotoga Tumaoti e faatino ai a latou foi galuega ma polokalame. O le lagolago lena a lo tatou Malo o lo o tuuina atu i

Faalapotopotoga Tumaoti e fesoasoani ai i a latou foi galuega ma taumafaiga o lo o fai. E i ai foi taimi e valaau atu ai i latou ia e le Matagaluega i nisi o paaga e auai mai i nisi o polokalame, ae le fia auai mai. E i ai foi taimi e tuuina atu ai fesoasoani tupe e faatino ai polokalame a nisi o Faalapotopotoga Tumaoti, ae a tulituliloa, e le o faia lava polokalame e pei ona talosagaina ai nei seleni. E oo lava ina toe auai atu le aufaigaluega a le Matagaluega o Tina ma Tamaitai e fesoasoani i nisi o Faalapotopotoga Tumaoti. E le gata i le tuliloaina o le faatinoga, ae o le fesoasoani i le tuufaatasia o Lipoti, ina ia mafai ai ona faaaauau pea le lagolago i faiga paaga ma Faalapotopotoga Tumaoti. E taua tele le vaega lea, ona e le faapea na ona tuulafoai atu o seleni, e ao ona tulituliloa po o faaaoga tatau le seleni lea i mea na talosaga mai e faaaoga i ai. Afai foi ua faaaoga, e manaomia lipoti ma faamaumauga, leaga e manaomia mai e a tatou paaga o lo o aumai ai seleni nei mea ia. O lipoti ia ma faamaoniga ia o lo o faaaoga tatau le latou seleni o lo o faamatuuina mai e ala mai i le Malo mo le faatinoina o ia polokalame. O le faailoga lena o le faamaoni o upu ma tala e uiga i faiga paaga o lo o faatino e le tatou Malo e tauala atu i le Matagaluega a Tina ma Tamaitai, Afioaga faapea foi le tatou atunuu.

O se tasi o faiga paaga sili ona taua, o lo o faamalosia e le Matagaluega, o le galulue faatasi lea ma afioaga uma o le atunuu e auala atu i sui o nuu ma sui tamaitai o nuu faapea sui o le Malo. O se tasi vaega taua e ao ona silafia, o lo o matou galulue faapaaga ma Komiti a Tina i totolu o nuu ma afioaga ina ia uunaia pea atinae mo le manuia o nuu ma afioaga ma le manuia lautele o tagata o lo tatou atunuu. Ma o se faiga paaga taua tele e faaaauau pea. O lea e pei ona ou tolaulauina atu, e tusa ma le 20 Faalapotopotoga Tumaoti lea o lo o fai paaga ma la tatou Matagaluega o Tina ma Tamaitai. Ou te faapea atu ai, e sese tuuaiga e faapea, e le o aliali ni faiga faapaaga a le Malo ma Faalapotopotoga Tumaoti.

Lau Afioga i le Fofoga Fatalai, ia ona ou oo mai ai lea i mataupu e uiga i faiga faavae po o iugafono a nuu. Sa masani ona taua lea o mea o Tulafono laiti foi ia o lo o aofia ai i totolu o ia faiga faavae, lea o lo o taua nei o Tulafono laiti po o by-Laws a nuu taitasi. O se tasi lea o galuega taua e lagona ai le fiafia ona o le matauina o le toe faaaauauina e nisi o afioaga o le faamaumauina lea o a latou iugafono po o faiga faavae a le nuu lava latou. O nei faiga faavae po o iugafono e pei ona aiaia i le teuteuga o le Tulafono a Nuu 2017 – Village Fono Amendment 2017, ua faamanino ai e le pule mamalu a alii ma faipule o se afioaga iugafono i ni mataupu ogoga sa tagofia e alii ma faipule ma ua faia i ai ni iuga ma ua faamauina e avea ma alafua e tali atu ai i ni mataupu e tali tutusa pe a toe tulai mai i le lumana. O se vaega taua tele ua faamauina i totolu o nei faiga faavae faale-nuu, o iugafono o ituaiga soligatulafono faapea ai ma le faasalaga ua fuafua mo se tasi, po o nisi o latou te faatinoina ia ituaiga soligatulafono. O lo o aofia ai i nei soligatulafono le fasi ava po o le sauaina o tina ma tamaitai po o fanau

foi, faapea ai ma faasalaga ua faavasega e le afioaga lava latou e fua i luga o le finagalo autasi o alii ma faipule o le nuu. O lo o faaaauau le galuega ina ia faasopolia afioaga uma, ina ia mautinoia ua resitala uma mai nei faiga faavae faale-nuu e pei ona mommia e le Tulafono. E taua tele lenei galuega ina ia mautinoia le tausia pea o le filemu ma le nofo lelei o tagata uma i totonu o nuu ma afioaga o si o tatou atunuu. O se galuega taua tele lenei, ma e momoli atu ai foi le faafetai ma le faamalo i itumalo uma ua maea ona tuufaatasia, a latou taiala mo atinae. Aemaise ai le faafetai i le saofaiga mamalu a alii ma faipule o afioaga ua maea ona lesitala mai a latou faiga faavae faa-lenuu, po o iugafono i le tatou Matagalueuga. O ia faiga faavae faale-nuu a maea ona lesitalaina, ona tuuina atu lea o le kopi i le Ofisa o Leoleo, o le kopi i le Ofisa o le Loia Sili, o le kopi i le Ofisa o Faamsinoga. O lala ia o lo tatou Malo e ono nafa ma ni faafitauli, e tulai mai i totonu o afioaga e aofia ai soligatulafono. A o lea ua taoto ai le tofa ma le faautautaga a afioaga taitasi, e silasila foi i ai ma fesoasoani, ia latou foi faaiuga fai. Pe a oo ina taunu mai ni matapu ogaoga faapea i totonu o le Tulafono.

Lau Afioga i le Fofoga Fetalai, e pei ona silafia le feagai ai o si o tatou atunuu ma le faamai o le misela, i le taufaaiuiu o le tausaga 2019, e tele le sao o lenei Matagaluega,

FOFOGA FETALAI: Lau Afioga o lo o saunoa se i tulai mai le sui usufono o Palauli le Falefa, le Afioga ia Faumuina Tiatia Liuga.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai, faafetai mo le avanoa. Se i fai foi se malologa a le Afioga i le Minisita. O le taua ia o le matapu leaga o lea ua see i le Koviti-19. O le matapu lea o le Tulafono a nuu ma le Tulafono ua faavae ai nei, ona o la e faafogafoga mai le puleaga, ma e talu ai o tatou. O lea tatou te nonofo i totonu o fono a nuu. O le tulaga lea e pei ona saunoa i ai, o le amanaia lea e le Faamsinoga, o faasalaga faale-nuu pe afai o le a molia mai se solitulafono ua uma ona fai i ai, faaiuga a nuu ma faasalaga a nuu. O lona uiga, e tele le aoga o le fesootaiga lea, i faaiuga fai a nuu, ia latou tulafono faale-nuu e faasala ai nisi ua solia le tulafono. E faapena foi ona amanaia e le Faamsinoga o Soligatulafono. Ma le faaaloalo lau Afioga.

FOFOGA FETALAI: Malo faafetai. Ma e faamalie atu i le Minisita, o lea sa taua tele le fesili lea. E leaga o la e faafogafoga tapuai mai le atunuu. I faasalaga ia e faatino i totonu o afioaga, ae aumai le faamsinoga e faaaauau. Aua e ese lava faasalaga faale-nuu ese le tulaga o le molia mai i le Faamsinoga. A o le fesili foi a le Fofoga Fetalai, e toe faafoi se kopi i le nuu, aua o lea o le a kopi le Matagaluega o Faamsinoga, kopi le Ofisa o Leoleo, e moni lava, ae le o tofu kopi foi le afioaga. Ae po o oo se tulaga faapea, o latou taofi mau ai. Se i tulai mai le Afioga a le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e taua tele le mataupu lenei. Aemaise tatou nei e auai i le tele o fono a nuu ma fai ai faasalaga. Ma o le tele foi o faasalaga nei, e eseese lava, o le tele foi o faasalaga e faa-fasitepu. Aemaise lava pe a faasala atu le tagata, ae tetee e fai le sala. Ona sitepu loa lea i luga o le faaiuga. E taua la itu ia, ina ia malamalama lelei ai ia i latou foi e tetee. A o latou ia e tetee o isi tagata ia e faatupu vevesi i totonu o nuu, aemaise foi pe faapea ua saili mai se loia, mo se mataupu lenei, i le tulaga o le faatino o lana aia tatau. O le fetotoaiga la lea o lea e taua ai tele le Teuteuga lea o le Tulafono. E faataua ai le aia tatau a le toatele, aia tatau a fono o nuu. Ona e tele lava mataupu faapenei, ua iu ina malepelepe ai nuu. Ona e oo mai i le loia, e matua le malamalama lava le loia, e le faitau foi le loia i tulaga ia o fono a nuu ma le faatauaina o le fonotaga e le Tulafono. Na afua atu i totonu o le Palemene lenei. O lea ou te manatua i le taimi sa aumai ai le Tulafono a o soifua le Tootooalii, na faapea foi le vevesi, le vevesi o loia. Ma na tumutumu ai pepa i le matua tetee ona o le tele o atunu u le faatulafonoina le Tulafono lenei a nuu. Mo mea o tu ma agaifanua a lea atunu u ma lea atunu u.

Lau Afioga i le Fofoga Fetalai, o le itu la lea, o lea sa ou tulai atu ai, i le tele o le gasu e tulai mai i totonu. Ma iu lava ina malepelepe ai ia... ua faatuiese ai nisi ua o ese, faatuiese, ua oo ina vaeluaina ai nuu. Ma oo mai ai le mataupu lenei i i, i le Minisita ma alu atu ai loa faaiuga. I le mea lava lea o le taua tele, o faaiuga ia a nuu e taofiofi ai le amio leaga ma le faatuala, o le faasiliaupule. Aua o le iuga o mea ia o le faatautee, ae le amanaia se tagata le faaiuga ua fai e le nuu. O i tonu lava e malepe ai le mamalu o le nuu ma le pulega mamalu. O le taofiofiga o le tagata, ua faatuiese ma faatupu faalavelave i totonu o le nuu. Aemaise lava i le mataupu lenei tau le tapuaiga. Ua taoto foi faaiuga a le Faamsinoga i le tulaga o tapuaiga, i le tulaga e faataoto manino mai ai. E le taofia ia lau aia tatau, ae o le tulaga i le falesa po o itu ia. E te savali e te lotu i le isi falesa lea e lata mai i le isi nuu.

E tele lava le taua o le piipiiama atu o le Malo e faamamalu ia iuga nei a nuu, ona a tuu mai loa i Faamsinoga Solitulafono, e i ai le taimi e alu alu ai lava le Faamsinoga lea Solitulafono. Ou te le o talanoa atu i le Faamsinoga o Fanua ma Suafa. E alu alu lava le Faamsinoga Solitulafono, fesili loa le faamasino. Na fai se faasalaga i le nuu? E tau atu loa ua fai, pau mama loa le sala e fai. O le taua la o le laga lea e laga atu i i, ona e toatele lava tagata e le malamalama i le itu lea, ma tetee e fai le sala. O le isi itu, e le taofia foi e le pulega mamalu a le nuu, ia le aia tatau lava a le tagata ia e sau ai, e fai lana moliaga. Ma o le tele lava o mataupu faapenei, mo le faataitaiga, o le fasioti tagata, se i tulou. E fai lava le sala e teu ai le vatapuia o le lotoifale, i totonu lea o le nuu. Ae le taofia ai le aia tagata e aumai le mataupu i i, i le Faamsinoga o Soligatulafono. Ma o i ina la e le tau taofia foi, e o atu lava leoleo aumai loa, leaga o le soligatulafono matuia.

O le itu la lea ia manino lelei, o lea e o faatasi lava tu ma agaifanua o le faasalaga, ma le Tulafono o Faamsinoga o Soligatulafono. O lea e aloaia lelei aia tatau ia taitoatas i ma aia tatau ia o finagalo o alii ma faipule. E ala ona ou talanoa atu i mea ia, ona e tele mea na tutupu i lo matou foi nuu. E tele mea na tutupu, e le gata o mariuana ae o le fasioti tagata. E fai lava le sala i le nuu ia faatumauina le pule mamalu lea, ae le taofia ai le aia tatau a le tagata ia, e aumai lana mataupu i le Tulafono. Aemaise lava pe te i foi ua iloa e leoleo, ua logo mai leoleo, e le taofia lava leoleo. E fai lava le tiute o leoleo e o atu e loka mai ai le tagata. E o atu foi la, a o la e i ai le puipuiga a le nuu, e fesoasoani i le faatinoina le lagolago ifo a le nuu i leoleo.

Lau Afioga i le Fofoga Fetalai, o le taua o le itu lea, ina ia silafia ai, o alii ma faipule o isi leoleo ia a le atunuu lenei. O latou foi o leoleo o lea e exercise, o lea e faaaoga le latou pule faamalumalu. E aumai ai le tagata solitulafono, pe molia mai lava, pe o mai lava le nuu ia aumai. I le nuu lea o la e i ai tagata, o taitai o le nuu, e malamalama, e loloto le tofamamao, le faautautaga.

FOFOGA FETALAI: Malo faafetai, o lea ua manino. Ia faafetai i lau Afioga i le Palemia, o lea ua manino, manino auofala i le itu ogaoga lea. E leaga o la foi e tupu i lo ta nuu i Fasitoo-uta. I le faafogfa tapuai mai a Satuala ma... a o mea ia o lea e faafoe ai. Malo faafetai. Se i tulai mai lava le Minisita.

Afioga Hon TUITAMA TALALEI TUITAMA: Faafetai i lau Afioga i le Fofoga Fetalai, malo foi faafetai mo faauilavea e faamalamalama atili ai lenei mataupu. Ae e tali atu i lau faafesili i lau Afioga i le Fofoga Fetalai, e faapena, a maea loa ona lesitala ona avatu lea o le kopi a le nuu. Ona o lea o le nuu, manatua o nei ona po ua tele masini e ta ai kopi. Ona o loa lea e ta ni kopi, ia tofu le matai ma le kopi. Ona nofounta ai lava lea i Tulafono o lea o lo o tausia ai nei se afioaga ma se alalafaga.

Lau Afioga i le Fofoga Fetalai, o lea ua saunoa le Afioga i le Palemia, o le tulaga tonu lea o lea e i ai. A faapea e uma ona resitala i le Faamsinoga, a oo ina oo mai le mataupu i le Faamsinoga, e amanaia e le Faamsinoga se faasalaga ua uma ona faatino o lo o i lalo o Tulafono ia a nuu. Ae le taofia ai lana ia lava faaiuga e fai, e tusa ai ma le soligatulafono.

Lau Afioga Fofoga Fetalai, ma le mamalu o lenei Maota, ia manatua foi, o tatou uma e saofafai i saofaiga a nuu. Ua outou silafia uma ma o tatou iloa, a oo ina fai faasalaga, e i ai le togisala, e i ai foi le vaesala. A oo la i le taimi e fai se faasalaga, o se agasala matuia. E 100 aumatua, ia o fea a aumai ai na aumatua e 100? O le a la le faatinoga? E tele lava ina... ia finagalo malie, ua na o le 5 ni manu ua maua mai. Ia tootutuli mai faamolemole ua le ausia, ia faapea atu. Ua lava lena ae aua le toe faia, e faapena faiganuu. E le faapea ina ia, o le tele lena o nuu. E i ai lava le agaga, ma o le uiga o nei Tulafono,

e tuu i luga as a deterrent, ia taofiofia ai, aua le faia. Ae leai se agaga o le nuu, e faapologa tagata o le nuu i ia tulaga. E na ona fai o le sala ia tele faatino, ma faaupu o le sala lea e fia selau, pe \$50,000 le sala. Ae o le tulaga lea, e taofiofia ai ia le nuu, aua ne i oo i ai, aua ne i faia. Ae le o le agaga e faapologa ai le nuu. A oo lava la ina togisala ma tuuina mai, i le tele lava o nuu, e faamalieina lava i le faatoesega ma loimata maligi pe a le ausia se faasalaga ua tuuina atu. O le tulaga ia o le tatou nonofo ai ma le tatou lotoifale.

FOFOGA FETALAI: Ia malie lau Afioga i le Minisita o Tina ma Tamaitai. Se i tulai mai lava le sui usufono mo Falealili Sasae, le Afioga ia Teo.

Afioga Fuimaono Teo Samuelu Teo (Falealili Sasae): E taua le vaega lea ua oo i ai le saunoaga a le Afioga i le Minisita, ae na ona piiama i le faamaninoga e le Afioga i le Taitai o le Malo. O le taua ia, e le faapea o le a faia tulafono i totolu o nuu, ona faapea ai lea e tatau lava ona o mai e resitala. O la e i luga lava o le faitalia a le nuu ia, pe o mai e lesitala le latou tulafono lea pe leai. A o le aoga o le vaega lea, a oo i le taimi e fai ai le suesuega po o le faamasinoga, ona tapa lea o le Faamasinoga o Tulafono ia a le nuu. Ma le isi itu, e tatau foi ona malamalama o tatou afioaga ma nuu. O tulafono e fai i totolu o nuu, e tatau lava ona limataitaiina i le Tulafono autu po o Tulafono Faavae. Ona e i ai nisi o nuu e i ai o latou faasalaga ma tulafono e matua o ese lava ma le faavae. O le vaega la lena e autilotilo i ai alii ma tamaitai o le Faamasinoga ina ia mafai ai ona faatonutonu le tulaga o faasala. O le vaega taua o le toe Teuteuga lea o le Tulafono, o le Village Fono Act 1990. O lea ua i ai i totolu ma le tulaga foi lea, a fai se faasalaga i le nuu a o le i faasalaina le tagata, aami le tagata. Ia aami le o le a faasala, e alu atu e avatu lana pitolaau, se i faafofoga foi le nuu, a o le i faia lo latou faasalaga. Aua e peiseai o aso ia, o tatou lava e faapena. O le mea lava ua tasi i ai le tofa a toeaiina o le mea lena e fai. Ae peitai, o lea ua i ai le vaega lea, e amia ai le tagata e faamanino lana pitolaau, ona faatoa togi lea o le sala. E solitulafono la pe afai e le faatinoina e le nuu le mea lea. E ala ona ou fai atu, o le Aso Faraile lea na tea nei, na faatea ai se tasi o toeaina, ua leva ua 8 tausaga o faatea ma le nuu ou te le taua le nuu. Ae peitai, o le faatea o le toeaina lea, e le i tu se tootoo o le nuu, e le i amia foi le toeaina, e alu atu e faamatala lana pitolaau. Ua taumafai le toeaina e alu i le nuu ma ave le sala, peitai, na tetee. Ona faaaoga lea o le taumafataga ae le faaaoga le sala i palapala-a-malo. Ua oo mai la i le Tulafono, o lea ua autilotilo le Tulafono i le vaega tonu lava lea. Ia o le iuga na lau i le Aso Faraile, toe foi le toeaina i le nuu. E le i usitaia e alii ma faipule le tulaga lea, o le aami atu o le toeaina e fai sana faamatalaga. Aua o la e tu le toeaina e puipui ona fanua, o fanua o lo latou aiga, a o lea e nonofo ai le nuu ma sa. E pei o se faamaninoga atili

lena, o lea ua i ai nifo o le Tulafono, peitai o le taimi muamua e le i ai ni nifo o le Tulafono. Ma lou agaga faaaloalo.

FOFOGA FETALAI: Faafetai i le saunoaga a lau Afioga i le Minisita Lagolago i le mataupu, o lea ua manino auofala, malo foi le fesoasoani mai. O galuega lava fai toa-lua e faapena...Tulai mai lau Afioga i le Minisita.

Afioga Hon TUITAMA TALALEI TUITAMA: Ia faafetai le fesoasoani mai, i le Afioga i le sui usufono mamalu o Falealili. O lea ua taua ua i ai nifo o le Tulafono, o lona uiga ua tea ma le susu. Lau Afioga i le Fofoga Fetalai, ae sao lelei le saunoaga a le sui usufono. O le iloiloga auiliili lea o le Tulafono, o lo o faamamafaina ai le vaega lea. O se o le a faasalaina, e tatau lava ona amia i totonu o le nuu, ma aumai lana version pe aumai lana defence, e faamalamalama lona situation, lona tulaga o lo o i ai, ona faaauau lea o le finagalo o le nuu, e tusa ai ma lana faaiuga ua fai. E tulai le faauilavea lau Afioga i le Fofoga Fetalai, ua ou oo mai i le vaega lea, o le misela lea sa ou talanoa atu ai i le taufaaiuiu o le tausaga 2019.

E tele foi le sao o lenei Matagaluega, e pei ona galulue faatasi ai ma paaga ma sui o le atunu, e lagolago ai i le Matagaluega tele. I lenei galuega tele sa feagai ma lo tatou Matagaluega o le Soifua Maloloina, e ala i le savalia o aoga uma, o aiga uma i totonu o le atunu. Ina ia mautinoa ua faatino uma tui puipui o le misela, e pei ona finagalo ai lo tatou Malo. O se galuega ou te talitonu lau Afioga i le Fofoga Fetalai, na taunu manuia, ona o le galulue faatasi. E le gata o le Matagaluega a le Malo ma paaga, ae faapea foi i le lagolago mai a le mamalu o le atunu, aemaise lava o galuega fai a sui o nuu ma sui o le Malo, ma sui tamaitai o nuu sa galulue faatasi foi ma tatou paaga e pei ona ou tolaulauina atu. Ma o lea ua uma foi ona saunoa i ai le Taitai o le Malo, i le tulaga lea ua uma ona faasolo ia le aso na taofia uma ai galuega a le Malo, ae faasolo le faiga o tui puipui. Ae toe alu atu la le galuega lona lua lea, e ova i le 2,000 i latou e le i faia ia tui puipui. Ma o lea sa faatino foi le tele o le galuega lea, e lenei Matagaluega ma ana paaga ia, i le sailia o i latou e le i oo i ai ia le faiga o le tui puipui.

Lau Afioga i le Fofoga Fetalai, a o tau faamaea galuega a le misela, ae faapea loa ona poia le lalolagi e le Koviti-19, e le i faatali foi le tatou Matagaluega. Ae sa tulai loa ma amata le galuega faatasi ma paaga e fesoasoani i Matagaluega a le Soifua Maloloina. E ala i le faatinoina o polokalame, e logologo pualii ai le atunu i auala mo le puipuiga, o le faamai Koviti-19, aemaise ai lava o tapenaga i itu uma ina ia mafai ona tatou tali atu, i aafiaga o le faamai, pe a fai e oo mai i o tatou laufanua. O nei tapenaga sa oooo lava i itu uma. E le gata o le tapenaina o le lotoifale i le tumama lautele ma puipuiga, ae faapea foi i le tulaga o meataumafa, e ala i le uunaia o le totoina o faatoaga ma laauaina, faapea foi ma mea fafaga, e tua i ai i taimi faigata. Sa faatino foi e le Matagaluega ma ana paaga, le

tufatufaina o laau toto, e pei o tiapula, o laau e vave ona ola, e vave ona matua, e vave ona faaaoga. E i ai manioka ma umala, faapea foi ma laau faisua mo nisi o aiga ma afioaga, sa manaomia tele lenei fesoasoani.

Sa tufaina foi nisi o fesoasoani e pei o mea faitino, mo oloa mo le tausia o tumama i totolu o aiga, ma puipuiga po o mea ia e taua o hygiene packages. Po o nai afifi o mea faitino e fesoasoani i le puipuiga mai ai. e pei o masks o hand sanitiser lea e i totolu packages o afifi nei, lea sa tufa i tua i aiga e fesoasoani ai, mo aiga e maaleale le tulaga o le soifua. Aemaise ai foi tina ma fanau e i ai aafiaga tumau o le soifua. Sa mafai foi ona tufaina faatasi ai ma pepa talaoloa mo mea taumafa ma pepa mo cash power, o lea sa mafai ona faatupeina e Faalapototoga o Malo Aufaataasi. E ui lava o lo o saogalemu pea i tatou i lenei taimi, mai le faamai, ae o lo o faaauau pea. Ia lapataiga ma faamanatu e tauala atu i sui o nuu ma sui o le Malo ma sui tamaitai o nuu. Ina ia tulimatai pea puipuiga i totolu o nuu, ma afioaga, ina ia faaitiitia le popolevale ma le le mautonu pe a fai ae oo mai le faamai i si o tatou atunu. O se faataitaiga, o cash power sa tufaina atu i na i aiga ia e vaivai le tamaoaiga ma o lo o i ai e o i ai aafiaga tumau ma fanau iti. E tusa lea ma le 375 cash power tai \$20, o lea sa tufatufa atu i nai aiga ia. I le aofaiga e tusa ma le \$7,500. O le tasi, o mea ia o food packages vouchers, o pepa tala oloa e tusa le value ma le \$200, lea sa tufaina atu i na i aiga e tusa ma le 800 aiga o lea sa tufa i ai lea fesoasoani, e fesoasoani ai i taimi ia. Ma mea ia o lea ua taua nei o hygiene packages, o lo o i ai toilet soap o toilet paper, o detergents mo le faamamaina o faleui. Ma tulaga uma faapena, e 1250 ia afifi nei o mea faitino nei sa faasafuaina atu, e tusa lona tau ma le \$136,000, lea sa tufatufaina atu i aiga e vaivai tamaoaiga ma aiga e i ai aafiaga tumau o le soifua.

Lau Afioga i le Fofoga Fetalai, ona ou oo mai lea i le atinae o vai tumaoti. O se tasi lenei o atinae a lo tatou Malo, e pei ona galulue faatasi ai le Matagaluega a Tina ma Tamaitai, ma le Faalapototoga o Vai Tumaoti i totolu o le atunu. O le taimi nei, pe tusa ma le 30 le aofai o vai tumaoti, ua maea fausia, ma ua faaaogaina e le mamalu o nuu ma afioaga o lo o i ai vai tumaoti mo le fofoga taumafa. O nisi afioaga sa i lalo o le polokalame lenei, ua toe liliu le tofa ma toe liiliu le latou faautautaga, ma o lea ua finagalo lava i latou, e toe faasee mai i lalo o le auauana o le Pulega o Suavai. Mo le auina atu o le suavai i o latou maota ma laoa. Ma o se tulaga lelei foi lea lau Afioga i le Fofoga Fetalai, ona e i ai lava le popolega o le Matagaluega i nisi o vai tumaoti. Ua ese le manao foi i le vai tumaoti, ae le lelei ona maintain, e le lelei ona tausia faalelei, ina ia saogalemu le suavai. O vai tumaoti foi, o lo o i ai lava i latou ia le matafaioi o le sailia lea o le suavai, o lo o maua mai i le vai, po o tumau pea lona mama atoatoa, mo le fofoga taumafa. O le masina o Tesema o le tausaga na tea atu nei, lea sa faamaea ai ma umusa le galuega o le vai tumaoti a le afioga o Saaga i Siumu. O le taimi nei, o lo o faagasolo foi le isi vai tumaoti mulimuli lea i lalo o le Matagaluega lenei, o

atinae o vai tumaoti, mo le afioaga o Paia i Savaii. Ma o lo o faamoemoe e faamaeaina lenei galuega i totonu o le kuata o lo o faagasolo nei. O le atinae o vai tumaoti, o lea ua taoto atu i le Faalapotopotoga o Vai Tumaoti. E latou te faaaauauina, ma o lo o avanoa pea foi lea Faalapotopotoga o Vai Tumaoti mo talosaga a afioaga, e manaomia lea auaunaga mo vai tumaoti. Ae o le a le toe i ai la se... o lea o le a tuu i ai ia i latou ia latou te tauaveina. O le faamoemoe foi o mea nei o vai tumaoti, e i le afioaga lava latou ia latou te vaania paipa e liki ma papa ma maumau ai le latou suavai. E fai foi e latou ia pilo latou vai e talafeagai, ma o le faamoemoe o le seleni, e ao ma faasao. A oo i le taimi e manaomia ai ia lypea, ona faaaoga mai ai lea o le latou seleni lea, e faalelei ai lo latou lava vai tumaoti.

Lau Afioga i le Fofoga Fatalai, na o sina upu i le ie Samoa.

FOFOGA FETALAI: Se i tulai mai lau Afioga i le Matua Tafua, Aleipata Itupa i Lalo.

Afioga Tafua Maluelue Tafua (Aleipata Itupa i Lalo): Malie lau Afioga i le Fofoga fatalai, e le fia faalavelaveina lava le saunoaga le sui mamalu. Atonu e manaia foi le fai ma faalavelave i ai, e fai ai sina malologa a le Afioga i le Minisita. Ae ua ou tulai atu ma le agaga faaaloalo ona o lea o le a see ese le Afioga i le Minisita ma le mataupu lea o tatou vai tumaoti. O lea foi e maua atu i le saunoaga a le Minisita, o lea e i ai le vaega o le asosi po o le Faalapotopotoga o Vai Tumaoti. O lea foi la e maua atu ua i ai le vai o Saaga i Siumu ma Paia. Ia, na taua foi e le Afioga i le Minisita, o liki ma papa foi ia o paipa.

Ae pei o le agaga o lau fesili, talu ai o le vaitaimi o le Koviti-19 ma le vevesi o le faamai foi lea i totonu o le suavai o le E.coli po o le siama foi lea e mafua mai i le... o le siama foi lea e feaveai e tatou. O le ala lea o lou fesili, ona o lea e i ai lava le mau, e palasi lava i le nuu ia le vaaiga o le saogalemu o le latou suavai, aemaise lava le vaega lea tumaoti. O le agaga la o lau fesili, talu ai le vaitau o le faamai o lo o pepesi ma o lea foi e lata mai lipoti sa maua mai nusipepa ma faamaumauga, o le E.coli lea e feaveai lea e maua ai le tatou suavai i nisi o vaega, ae le o vaega uma o le atunu.

O le agaga la o lau fesili ma le faaaloalo i le Afioga i le Minisita, faamolemole po o i ai se fuafuaga mo le puipuiga o le faamai lea o le E.coli aua o lea foi e maua mai i faamaumauga a le SROS ma le falemai, o lea e fai ma sue, test a tatou vai, vaitaumafa aemaise lava vai a le Malo. A o suavai ia lea e palasi i le asosi lava ia tumaoti, e le o i ai la se... o lea ou te le o malamalamai au. O le ala lea o lou tulai atu ma le agaga faaaloalo, pe faamata o siaki vai ia mo le saogalemu o nai alaalfaga ia e taumamafa i le vai tumaoti. Ma le agaga faaaloalo.

FOFOGA FETALAI: Malo. Ia, malie le Minisita se i tulai mai se tasi o sui usufono matua o lea Maota lau Afioga Faumuina Tiatia Liuga.

Afioga Hon Faumuina Tiatia Faaolatane Liuga: Faafetai i lau Afioga i le Fofoga Fetalai. Ona o le tasi o vaega o lou itumalo lea e lavea i lalo o le vai tumaoti. E 2 vai ua uma ona test o lo o saogalemu, o le vai tumaoti lea e i Sili, lea e lavea ai Gautavai, o Papa ma Puleia, matua saogalemu. O le isi vai la e saogalemu, o Salailua.

Ma lou faaaloalo lava.

FOFOGA FETALAI: Malo. O ok Falealili pe i ai se mataupu e fia tulai mai ai?

Ia, se i tulai mai la le isi itu o Falealili, le Afioga ia Aumua.

Tofa Aumua Isaia Lameko (Falealili Sisifo): Faafetai mo le avanoa. Lau Afioga i le Fofoga Fetalai, o se faafesili faamolemole. Aua o lau matau i ai, e pei o le fua taualuga a lo tatou Malo ia maua le suavai lea mama lea o lo o faaaaoga e le Ofisa o le Suavai. O o i matou nuu o Sapunaoa ma Saleilua e i ai vai o lo o faaaaoga e le Malo. O lea foi la sa talosaga ai i vai tumaoti, peitai ane, o le tala a le... e le mafai ona fai se vai tumaoti ona o lea e i ai le vai a le Malo. O lea la ou te fia iloa, po o fea lea e ave i ai le faamamafa a le tatou Malo, po o le vai a le Malo po o le vai tumaoti lea e le tuua i ai i totonu se vailaau o le gluorine. Ma le agaga faaaloalo. Faafetai.

FOFOGA FETALAI: Malo. Pe i ai se isi faauilavea e faasao ai...

Ia se i tulai mai le Afioga i le Gafatasi ia Fuimaono Teo.

Afioga Fuimaono Teo Samuelu Teo: Lau Afioga o le vaega lava lea e tasi lau Afioga i le Fofoga Fetalai, e taua ia ona o le... Faafetai i afioaga o lea ua maua le latou suavai la e i ai, na pau lava le mea o le fia test po o saogalemu. A o si ou itumalo e i ai le auala lea e alu agai gauta i Salani-uta e oo mai i le taimi lenei, ia o lea la e taoto le talosaga. Faafetai i le Afioga i le Minisita pe afai o lea ua i ai lana fuafuaga, se i oo atu i ai se vai. E le mafai la ona test leaga o la e le i oo atu i ai le vai. Ma le agaga faaaloalo.

FOFOGA FETALAI: O lau lava mataupu o le leai o se vai a?

Afioga Fuimaono Teo Samuelu Teo: E faapena lau Afioga.

FOFOGA FETALAI: Ia, se i tulai mai le Minisita o lo o saunoa. Masalo e le o toe tele foi sau tapenaga.

Afioga Hon TUITAMA TALALELEI TUITAMA: Lau Afioga i le Fofoga Fetalai, toe 20 lava nai laupepa ia e totoe ona maea lea o se matou taumafaiga. Faafetai. Masalo pe uma lava taeao.

FOFOGA FETALAI: Ua alofa atu foi ua matua lau Afioga.

Afioga Hon TUITAMA TALALELEI TUITAMA: Lau Afioga i le Fofoga Fetalai, na ona ou tali vave atu i le tulaga lea, e 2 Matagaluega lea ua faafesiliglia ai le matou Matagaluega, o le Pulega o le Suavai ma le Matagaluega o le Soifua Maloloina. Ia na ona ou faamanino atu la, o le sailiga o le E.coli ma isi faamai faapena i totonu o le suavai, o le matafaioi lena a le Soifua Maloloina. E o e faataamilo e test mai po o saogalemu. A o le E.coli foi, e le o se faamai. O le E.coli o le siama, o le igoa o le siama e maua i totonu o le suavai. Ae mafua mai lava ona o suavai foi ia tafe mai i le palapala o lo o le saogalemu, ia ma tafe atu i totonu o le vaiinu.

A o le tulaga i le suavai tumaoti, o lo o i lalo lea o le faafoeina. Manatua foi lea ua uma ona ou tau atu, ua alu ese atu ma matou, ua le toe i lalo o le Matagaluega lenei le vai tumaoti, o lea ua i lalo o le Faalapotopotoga o Vai Tumaoti. A i ai la ni faafesili po o ni faafitauli e tulai mai, o le Faalapotopotoga o Vai Tumaoti o lo o fesootai ma le tatou Matagaluega o le Vai e a latou le matafaioi lena.

Lau Afioga i le Fofoga Fetalai, ona faaaauau lea o sa matou tala. I le tausaga na tea nei, na faatino ai le polokalame o aoaoga mo le lalagaina ma le gaosia o le siapo faapea foi le ie Samoa. O le faamoemoe, ina ia maua e tagata uma le avanoa e aaooina ai le lalagaina ma le gaosiga o nei measina taua a le atunuu, ma le naunau o le tatou Malo ina ia faateleina le numera o ie Samoa e lalagaina, ina ia mafai ai loa ona tafiese le tatou ie lapoa foi lea e i ai nei. Ua alofa foi i nai taulelea i le tauamoina o le mamafa o ie o lo o tatou faaaogaina lea e taua o le ietoga, ae faaaoga loa le tatou ie Samoa.

Ua faamaonia foi e lenei Matagaluega le tele o le tamaoaiga ua maua mai le tatou ie Samoa lea. Aua pei lava ona ou taua foi i totonu o le Maota lenei i se taimi e le i mamao atu, o le tau o ie nei, e le i lalo ifo o le \$5,000 i le tosi tasi. Ae o le tulaga na talitonu le Matagaluega o lo o vaivai ai le lalagaina o le ie lea, ona e le o silafia e le tele o i latou ia le lalagaina. O le tapenaina o le lauie, ma le lalagaina o le ie Samoa. O lea la na faatu ai loa le fuafuaga lea a le Matagaluega, ua aumai matuauu, o lo o latou gaosiina ma lalagaina le ie Samoa ua fai aoga po o workshops lea sa faatino e le tatou Matagaluega, ona valaaulia lea o i latou uma o Komiti Tumama faapea foi ma alo tamaitai o le tatou nuu ua le o toe i ai ni galuega, a fia saili manuia e ala i le tamaoaiga e maua mai le ie Samoa, omai e aoao le faatinoina o lea measina taua a le tatou atunuu. Ma ua maea la ona fai lea tulaga, ma o lo o molimaufina le faatupulaia o falelalaga talu mai ona faatino lea aoaoga.

E momoli ai foi le faafetai tele i le tatou Malo ona o le faasoa e ala i tupe laveai mo le faamai o le Koviti-19 e pei ona sa faamatuu atu i le lata ma le \$1 miliona tala i falelalaga uma i totolu o le atunu e fesoasoani ai i nai o tatou tagata o lo o feagai ma nei taimi faigata. O nei vaegatupe sa faamanuiaina ai tina uma o lo o auai i falelalaga, o lo o uunaia foi i le tatou polokalame le totolina o le lauie ma le lauua, ona o le talitonuga, e tatau ona lava raw materials po o le vaega o lauie ma lauua e faatino ai le faamoemoe lea o ie Samoa faapea foi le siapo. O se atinae manuia tele, ma o lo o faaauau pea e le Matagaluega ona tulituliloa falelalaga uma i asiasiga o lo o faatino ai le lalagaina o le ie Samoa. O le taimi nei, e 82 falelalaga i Upolu ae 56 falelalaga i Salafai ua maea ona resitala mai i le tatou Matagaluega. O falelalaga fou na resitala mai ina ua uma le aoaoga, Upolu e 26, Savaii e 7 falelalaga fou ia. Ona i ai lea o le tuufaatasiga, o Upolu e 108, a o Savaii e 63. E 171 le aofai o falelalaga o lea ua i ai nei i le tatou atunu. E oo mai i le taimi nei, o le aofaiga o ie Samoa talu mai ona faatino lenei faamoemoe i le 2013, o ie tosi tasi, ua 2,250 ie lea o lo o i ai nei i totolu o le atunu. Ie tosi lua – 240. Ie tosi tolu – 133. Ma o le tulaga lea ua matauina e le tatou Malo i faalavelave o lo o faatino nei ma tatou matauina, e seasea vaia se numera tasi o malaga ae i luga. Leaga foi ua taugata tele, ua pei o se oloa a aiga e teu mo le sailiga o seleni ma le oa e faatau atu i fafo. O lona uiga, o le tele o ie ia o lo o faaaoga nei i ie lalaga fou, o le tosi lua, po o le tosi tolu. Ma o lea la ua faamalosia ai foi e tatou... Sa taofi le tosi tolu, a o lea la ua toe uunaia e le tatou Malo, lalaga la le tosi tolu lea e faaaoga e fai ai a tatou faalavelave i totolu o le tatou atunu ona e manumanu tina i a latou tosi tasi. Ua uma ona ou faamatalaina, o le tosi tasi e 1 milimita le lautele. Tosi lua, e 2 milimita le lautele, tosi tolu, e 3 milimita le lautele. O ia tosi, e le mafai ona faatinoina i le tulaga sa i ai le tosiina o lauie i aso ia e faaaoga ai le naifi aulei po o se atigi figota foi lea e tosi ai, o lea ua faaaoga le nila. Aua e le mafai ona maua le vaiti lea pe a tosi i se isi lava mea vagana le nila e tosi ai, ona maua ai lea o le 1 milimita, 2 milimita, 3 milimita. Ia, ua uunaia tina ina ia toaaga e lalaga le tosi tolu ina fai ai tatou faalavelave ae vave ai loa ona faatea ese atu le ie lapoa o lo o i ai nei.

Lau Afioga i le Fofoga Fetalai, ia ona ou oo mai ai lea i Komiti a Tina. Ua maea faatino...

FOFOGA FETALAI: Se i tulai mai le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, e i ai lava si tulaga lea e taua tele ai le galuega a le Komiti lenei, ona e fai lava si tele o le seleni lea e alu i le tausaga, tausaga taitasi. O se seleni e faitioina pea e nisi, pe le ua tatau ona faamatuu atu loa le tulaga lea e faaauau pea pei o tulaga sa sau ai, fai le falelalaga o le Komiti latou, soia ia

le toe aafia ai le Malo. O se tupe tele ua te i lava ua aafia ai le Malo ma tele ai foi le seleni e alu. A o le tele lava o le seleni lea, e i ai le vaega e faatino ai asiasiga e alu i tua, a o le vaega tele, o lea e alu i totogi faapitoa, pe a oo i le aso e fai ai le faalelegapepe. O lona uiga o le valaaau lea i tina e omai i Apia mo Upolu a o tina o Savaii e o ifo i Salelologa. E i ai lava la le manatu foi lele e faasao tupe a le Malo, ua aapa fua le Malo e faatino le galuega, o galuega lava ia e fai e tina, galuega e le tatau ona aafia ai fua le Malo. A o le mea lea ua tulai mai ma le faataua a le Kapaneta, a le amatamea le Malo ma faaauau pea, e alu alu ona motu lea.

E i ai le agaga taua tele o le faatosina lenei e mafai ai ona uunaia tina e o ifo e fai a latou falelalaga. I le taimi amata sa fai ai falelalaga nei, e i ai lava le agaga musua, a manao lava le tina ia... o le a le mea o le a ou alu atu ai fua i o, ae lelei lou nofo lava o au ia i le matou aiga ma fai a matou feau a maua le avanoa ua lalaga? A o le agaga la lea e saunoa i ai le Minisita e faatupu manatu, o le omai foi lele e fai a latou falelalaga e uunaia ai le agaga fiafia o le faatosina e lalaga. Ona e fiafia le isi tina e tilotilo atu, o la e foi e lalaga mai le isi tina. E pei la o le galulue lea ua auautasi i se mea e fai, ua avea lau Afioga... ua faatupu fiafia ai ma tina e fai a latou falelalaga, aemaise lava pe a i ai ma le isi mea. O le faatupu ai o le talatalanoa aua o tina lava latou ia e fia talanoa, talanoa i o latou taitoalua, talanoa i le aiga, talanoa i a latou mea e fai. O lea la e faatupu ai le agaga lea fiafia e o pea, o pea, o pea e lalaga ie nei. A o le faatupu manatu la ma le faamaite a le tatou Malo, o le atili ona maua ai measina a le aiga e tua i ai i faalavelave fai. Ma ua i ai foi le upu ua uma ona saunoa i ai le Minisita, ona o le measina lea e galulue ai latou, o le faatumutumuga lea o faaaloalogia Samoa. O lona uiga, e le tatau lava ona nofo, e tatau lava ona faaauau ma faaauau ai pea ma faaauau ai pea, ina ia tu tu pea le Malo i tua o ana tu ma ana agaifanua e uunai ma amatamea, faamaite mea lelei. E ogatusa foi la le fesoasoani lea e faafaigofie ai faalavelave fai o aiga, e tua lelei. E tutusa lelei lava aua o mea ia na o faatasi ma le faamamaavega lea e fai i le faalaititi o pusaapa mai le 48 la ua maua isi pusaapa i le tai 8 ae maua isi pusaapa eleni i le tai 6. Ua faafaigofie ai lau Afioga faalavelave fai o aiga. Masalo a na le laa i ai le Kapaneta e lagolago le mea lea, ou te le iloa pe i ai se faigamalo e alu alu ona manatu lea e faataua tatou tu ma aga i le itu lea o faalavelave fai.

O lea la e alu ai, ma i le matau atu i le saunoaga a le Minisita, o lea foi ua oooo le latou fuafuaga ina ia saunia ie ia e aoga mo faalavelave, faalavelave ia faifaipea, talu ai le tulaga faigata tele o ie tetele ia. E le gata ina tetele tele, tele le taimi e alu vale ai i le tapenaina, a o le mataga. O lea la ua tapena... a o faafogafoga mai ua tapena le ie lea, a o le ki atoa i le gauai e faaaoga le ie lea, o le ula, o le ula, ina ia lelei ona fai le ula. E tai tutusa lelei lava la le ula lea sa tapena ai le ie lea faapitoa mo faalavelave, ma le ula lea e tapena e ula ai le numera tasi. O lea la a tatala mai loa le ie lena ma tou matau atu, toeitiiti lava leai se eseesege, toeitiiti lava leai se eseesege i le matagofie o

le ula o le ie lea ma lona tele teisi ae, ae faigofie ona feaveai, faigofie, ma e atili mamalu ai foi a tatou sauniga i le avatu o ie lelei.

Lau Afioga i le Fofoga Fetalai, o le auau atoa lena, ma e masani ona faitio, o le a ea lenei ituaiga polokalame? O ie o ie a tina e fai mo latou mo latou lava faalavelave, ae toe alu atu le Malo e uunai, avatu seleni a le Malo e uunai ai, toe uunai ma mea ia o toga ua, lauua, ae toe uunai ma le gaosiga o le siapo. O mea tetele ia e lua e tua i ai, e taula i ai faaaloaloga aupito mauauluga a Samoa. O lona uiga, i le fia afe tausaga o le lumana, o le polokalame lea o le polokalame e faaaauau pea, ina ia faataua ai pea e Samoa ana measina. O le upu measina, o lea faatoa faataua ma mamalu ina ua toe teu atoa measina nei i le tulaga lea sa saunoa i ai le Minisita. Ma ou te faamalo foi i le Minisita faapea le Matagaluega i le latou uunaia pea o le polokalame lenei, o le polokalame e tatau ona faifaipea, e tatou te mitamita ai ma iloa ai Samoa i ana tu ma ana aga.

Ina ua ou alu matou feiloai ma le Malo o Fiti i le malaga lea sa ou malaga talu ai, o lea ua omai Fiti fai le latou ava, le latou ava faatupu, o mea lava ia e masani ai Fiti. Ia ma aumai latou faaaloaloga, ia ua tatou masani i a latou foi faaaloaloga, e aumai le nifo se i tulou o le tafola, ia ma le maea e saisai ai. Ia, ae tatala mai loa ma le ie, ae sau le solo a le failauga, ua matua faatumulia totolu i le leo o le failauga, o lea ua tatala mai le ie, o le ie o le tosi tasi. A o lea la ua tilotilo atu Banimarama, o lona tuaa, o le tina o lona tina o le Samoa, e na te malamalama i measina a Samoa. Na ona vaai atu lava o Banimarama vaavaai atu ua tala mai le ie i le manaia o le aumaiga. A o le mea la e masani ai latou, na ona aveane lava avatu loa i o sau le tagata o le Ofisa aveese atu. Na ona aumai lava, ua le taofiofia le Palemia, na ona valaau mai lava, aumai le mea lena e tuu i ou tafatata. E manao Banimarama ia aua lava ne i ninimo atu i tua le ie lea ma ninimo atu ai leaga e manaia tele le ie. O ituaiga ie ia, a sau foi le papalagi, na te fia avea, po o le siapo. E ave i fea? E alu atu ona faavaa loa lea i tioata tuu i luga o lona potu. A omai tagata i totolu o le potu o ana malo, e mitamita ai ma faasino i ai, o le ie lena o le measina a Samoa sa ou asiiasi i ai ma ou aumaia. I le taimi la lenei i le tulaga lea ua i ai measina ia, o ai se a le mitamita i le matagofie o le faamaite mea lelei lea e faatino e le Minisita ma lana Matagaluega.

FOFOGA FETALAI: Malo faafetai ua manino lea tulaga. O le manatu o le Malo ina ia tuu i luma e faapena ona atiae ma faamalosia le tatou measina, ia o le tatou aganuu foi lea i se isi itu o le faaupuga. Measina, ia o le aganuu lea a si o tatou atunu tatou te faamemelo ma faapelepele i ai.

Ia, talu ai o lea ua tatou taunu i le tatou malologa masani, se i faamaea le saunoaga a lau Afioga i le Minisita pe a tatou taliu mai i le tatou malologa.

E faasilasila atu o le a faataatiae Galuega a le Fono mo lana malologa.

Na faataatiae Taualumaga a le Fono Aoao Faitulafono mo lana malologa masani i le itula e 10:47 i le taeao ma toe faaaauau i le itula e 11:35 i le taeao.

Na toe faaaauau felafolafoaiga i luga o le faitauga faalua o le Tulafono Tau Faaofi o le Faatatauina o Tupe Faaopoopo (Nu.1) 2020/2021.

FOFOGA FETALAI: Ou te faasila sila atu ua toe amatalia Galuega ma Taualumaga a le Fono Aoao Faitulafono.

E faia le tatou malologa o saunoa le Afioga i le Minisita mo Tina ma Tamaitai.

Ma ou te tapa ma le faaaloalo lau Afioga i le Minisita e faaaauau le saunoaga.

Afioga Hon TUITAMA TALALELEI TUITAMA: Lau Afioga i le Fofoga Fetalai, ua matu fau i le taliga o le sua i lau Afioga i le Fofoga Fetalai. Ua palega auau foi se tautega aua se faasiliga malosi i le Taitai o le Maota, faapea foi le mamalu o le tatou Palemene. Faamalo faafetai i lau Afioga ma le aufaigaluega.

O le a faaaauau se matou faamatalaga, ona o lea ua toe laga le mataupu lea i le tatou ie Samoa e pei foi ona i ai ni faauilavea. Lau Afioga i le Fofoga Fetalai, se na ou talanoa lava i le tulaga lea o le faalelegapepe. Ua ta molimauina i le tele o tausaga le faagasologa o lenei faamoemoe o tina. Ma ou te molimau atu ma le faamaoni, o le tasi lenei aso tele o tina o Samoa, e sagisagi fiafia mai o tina o falelalaga, e le i malamalam a le taeao ae ua leva ona tapenapena ma sauniuni a latou ie o le a faalele. Ma e vaaia pea foliga fiafia ma le aleulia o tina i latou avanoa e faaali atu ai le latou taleni, aemaise foi o le latou tautiga i aso e tele. Aua foi e le pei o ie ia tatou te taumafai nei ia faaitiitia, pe tasi lava le vaiaso 2 vaiaso uma. Afai o le size lea lea e i ai nei ie Samoa, ia e le atoa se vaiaso a ua uma, leaga foi e lautetele ie. A o ie nei, e 6 masina e lalaga ai se ie se tasi ona faatoa maea lea. A oo lava i le taimi ua faalele ai a latou taumafaiga ia, e ese le matagofie o le matamata atu i le sisiva, pepese ma faaali o latou uiga fiafia ma le faafetai ua taunu le aso ma le faamoemoe o nei faalelegapepe.

Lau Afioga i le Fofoga Fetalai, e i ai le faalelegapepe sa ou auai, se ua ou faateia ona e aumai le isi ie manaia o le tosi tasi na lalaga, o le teineitiiti e 12 tausaga, ioe, lea na lalagaina le ie lea. Ae aumai le isi ie, o le tamaloa. Na lalaga e le tamaloa. O i ina lea na fai ai lau tala i le matou Matagaluega, aua ne i faapitoa i tina. E toatele le autalavou ua leai ni galuega o tama, ia na fai ai lava lau faataitaiga e faatusatusa i le galuega a le tama lea ma le galuega a le teine. A nofo le teine e 6 masina, e amata loa ona lalaga lana ie, e pei la

o le encouragement a le Malo lea e i ai, e maua lana \$1,000. E 6 masina ua uma le ie, faatau le ie, \$5,000. E \$6,000 e maua i le 6 masina. O lona uiga, e \$1,000 i le masina pe a faasoa le tupe lea e maua i le ie tosi tasi e tasi.

Ia, tuu la i le tama, e sue le \$6,000 lea. E alu e toto le maumaga, pe 3,000 le tiapula. E 9 masina e faatali ai faatoa matua le maumaga. E matua ae le maumaga, ua gaoia le isi 1,000, ioe, ae ua satia e meaituaolo le isi 1,000. Ae i ai le mea foi lea ua uma ma e le io lelei, masalo o le talo o le a mafai ona ia faaaaogaina e i lalo ifo o le 1,000. A faapea la e \$1 i le talo le tau lea o le a faatau ai, o lona uiga, i le 9 masina e le maua sana 1,000, pe na o se \$900 sana tupe.

FOFOGA FETALAI: E faamanatu atu i le Minisita, e i ai foi le auasamo.

Afioga Hon TUITAMA TALALELEI TUITAMA: A faaopoopo la i ai ma le asamo, o lona uiga pe na o se \$500, e uma ane ua alu toe aisi. E pei o le faataitaiga lena, a aua la le alu le tama e fai le maumaga, a o lena taimi i le 9 masina, laina, timuia, palapala, mageso, faatoa taunu lona faamoemoe. A o le tina, e nofonofo lava i le paolo o le fale, e pei o lea na saunoa ia i le Taitai o le Malo, ia talanoa atu i le isi tina, talanoa ma le isi lena, muimui o la taitoalua, muimui isi tina, ae uma ae le aso, i le 6 masina, ua mau ale \$6,000. E pei o se faataitaiga lata mai lea, ma le faigofie ona malamalamai. E a la pe a taumafai e uunai a tatou fanau tama ia ua leai ni galuega, ma nai toeaiina foi ia e lalaga faatasi le latou ie ma le latou tina. A lalaga lalaga le tina ua le lava, alu fai sana malologa, ae saofai le toeaina, ia saofai le toeaina, ia lalaga sana ia 2 futu, alu ia malolo, ae nofo atu le tama, fai sina ana ia 2 futu. E uma ane lava le ie lea, o le a vave ona uma le ie lea, e le toe tulia le 6 masina. E na o ni na i faataitaiga lau Afioga i le Fofoga Fetalai, ae le fai ai. O lo o i ai pea le tofa ma le faautautaga, ae na o na i faataitaiga na. E lua na i vaega ia sa ou matauina pe tatau ona ave i ai se fesoasoani. O lea sa talanoaina le ula, ula o le ie Samoa. O le ula i aso ia o ie Samoa, o lea tatou te matauina, sa fai i mea o fulu ninii lava. O fulu ia, o fulu o le segavaao ma le manutagi. O aso la nei, o lea ua i ai le puipuiga o manu ia e le tatau ona toe faatamaia. O lona uiga ua faigata ona maua le natural feather ma le lanu lea e lanumeamata, lanumumu ma le lanusamasama, lea e faaula ai le ie lea, ie Samoa. O lea la ua uma ona matou soalaupule foi ma le Matagaluega, ua fautuaina, saili mai ni vali e le sosolo. E leaga o le tele lena o isi ie Samoa ia, isi ietoga ia ou te matamata nei i ai, o le manaia o se ie ma le teu, ae ua pisia uma le ie i le vali o fulumoa, o lo o fai ai le ula o le ie. O lea la ua uma ona faatalanoa le Matagaluega, saili mai ni vali e le pisia ai le ie, leaga e maumauina ai le tautiga, pe a te i ua sosolo le vali o lo o vali ai fulumoa faaaaoga.

Lau Afioga i le Fofoga Fetalai, ua ou iloa ua lava lea talanoa i le ie Samoa, ae o le a ou faasolo atu i le Komiti a tina. Ua maea ona faatino ia galuega sa

feagai ai ma le Matagaluega, e feiloaiga ma Komiti a tina i nuu uma o Samoa. Ina ia manino le mamalu i afioaga o afioga i Peresetene ma Komiti o tina uma, i le naunautaiga o lo tatou Malo. Ina ia galulue faatasi, e uunaia atinae o le soifua maloloina, ma le tumama lautele o aoga, atinae tau tamaoaiga e aofia ai falelalaga ma isi. O atinae o faatoaga e aofia ai faatoaga o laauaina ina ia maua pea taumafa. E faapea ma polokalame e tetee atu ai i sauaga e faasaga i tina ma fanau. O le faamoemoe foi o lenei taumafaiga, ina ia auai ia tina uma, e lelei lava ona ou faamamafa tina uma o le afioaga i lenei komiti, ina ina maua e tina uma ma tamaitai uma o le nuu avanoa i atinae o lo o taumafai e lo tatou Malo aua le manuia o tagata uma. Ina ia aua ne i i ai se vaega o tina o le nuu, latou te le maua ia faamanuiaga o lo o tuuina atu e lo tatou Malo. Ma o le tasi foi lenei o manaoga e ao ona tausisia ina ia agavaa ai le komiti a tina mo le resitalaina i le tatou Matagaluega.

O le agaga maualuga, ina ia i ai uma tina o le nuu i le komiti a tina. O le tasi a tatou fonotaga, sa ou laga ai le vaega lea, lea sa i ai le faaupuga, inclusivity. O lona uiga, ia i ai uma tina o le tatou atunu. O le ala foi lea lau Afioga na ou taumafai ai nei, i lalo o le Tulafono o le filifilia o sui tamaitai o nuu, e filifili mai e le komiti a tina. Ona tuu atu lea i le fono a alii ma faipule latou te faamaonia, ona tuu mai ai lea i totonu o le Matagaluega, ona tuuina atu ai lea e le Minisita i le Kapaneta mo le faamaonia o lea sui. I lalo la o lea faiga, talu ai ona o lea e aumai na o nuu mavae, o lo o i ai le faaupuga i lalo o le tatou Tulafono, ma o lea o lo o taumafai nei le tatou Matagaluega ina ia faalauetele le komiti a tina, ia aofia ai foi ma komiti a tina, i nuu e le o ni nuu mavae.

Ma o le agaga lena o le Tulafono o lea o le a tagofia e le tatou Palemene i se taimi mulimuli ane. E pei ona silafia o lea ua maea ona faamatuu atu le komiti a tina, ua maea ona resitala mai le vaegatupe lea sa pasia e le Palemene i lalo o le tupe fesoasoani laveai a le Malo, mo le faamai o le Koviti-19.

O lo o faaauau pea le galuega ina ia mafai ona resitala uma mai ia komiti a tina o nuu uma o si o tatou atunu, ina ia maua e i latou uma ia avanoa e maua ai le fesoasoani mo a latou atinae o lo o taumafai i ai. E tele le talitonuga o lo tatou Malo i galuega faatino a le mamalu o le komiti a tina mo le manuia lautele o tagata uma. O le pogai lena ua le pitotasi ai le vaai a le tatou Malo, na o le tumama, ae ua lautele le vaai i isi matafaioi taua a le komiti a tina, e pei ona tau faamalamalama atu. O le taimi nei, e tusa ma le 208 le aofai o komiti a tina ma tamaitai mai nuu uma o Samoa ua maea ona resitala mai. Ae o lo o tau faamaea pepa o nisi o komiti mo le resitalaina. E toe faamanatu ai, mo le silafia e le mamalu o lo tatou atunu e tapuvae tasi uma komiti a tina ma tamaitai i le Fono Aoao a komiti a tina ma tamaitai, o lo o i lalo o le Matagaluega a Tina ma Tamaitai, Atinae o Afioaga ma Agafesootai. O nisi fono aoao a tina o lo o faaluafesasi ai nisi o tina e le o se tino po o se itutino o le tatou Malo. O mea lava a tagata taitoatasi. E leai se

fesootaiga ma le fono aoao a komiti a tina o Samoa, o lo o i lalo o le Matagaluega o Tina ma Tamaitai, Atinae o Afioaga ma Agafesootai.

E lelei ona ou toe faamamafa atu le vaega lea lau Afioga i le Fofoga Fetalai ma le mamalu o lenei Maota. I le tulaga lea o matafaioi, o lea sa i ai lava le tulaga le malamalama o nisi o tina. O lea lava ua faasolo lava, ma o lea o lo o faasolo pea la matou galuega e faamalamalama uma i tina ma komiti a tina, e tasi lava le komiti a tina e nafa ma galuega ia, o lo o i ai le tumama lautele. O lo o i ai le atinaega o togalaauaina, o lo o i ai le tapenaina o le siosiomaga ma le tumama lautele i totonu o nuu ma afioaga. E faatasi ai foi ma le tetee atu i tulaga e aafia ai tina ma tamaitai, po o le sauaina o tina ma fanau. Lau Afioga, e faapea foi ma falelalaga ua aofia uma ai lava i totonu o le galuega fai lea a komiti o tina ma tamaitai. E le o toe i ai le komiti o lea ma lea, le komiti o lea ma lea, e tasi lava le tino o le komiti a tina, e faasoa i ai galuega eseese ia, mo lea afioaga ma lea afioaga. O komiti a tina ua uma ona resitala mai i le tatou Matagaluega, o Upolu e 113, o Savaii e 76, o nuu e le o ni nuu mavae, o lea ua resitala mai a latou komiti, e 29. O le aofiaga faatasi o komiti a tina i Samoa nei, e 218.

Lau Afioga i le Fofoga Fetalai, e fia fai sina tala ia i latou ua ave i ai le faatuatuaga a le Malo, faapea le faamanuiga a nuu, afioaga ma alaalfaga o Samoa. E galulue faatasi ma lenei Matagaluega e avea ma sao o le tatou atunuu i le atinaega o lo tatou Malo ma lo tatou atunuu. O i latou ia o sui o le nuu, Upolu e 125, o Savaii e 84. O le aofaiga o sui o le nuu i le tatou atunuu, e 209. O lona lua, o sui o le Malo, Upolu e 46, manatua foi o sui nei o le Malo, ae o lea e faapitoa i afioaga foi ia e le o ni nuu mavae. Ma o lea o lo o i faataamilosaga o le taulaga. E 46 i latou, sui o le Malo o lea o lo o i ai nei. O sui tamaitai o nuu, o Upolu e 118, o Savaii e 77. O le aofai o sui tamaitai o nuu o lo o i ai nei, e 195.

Ona oo mai lea o sa matou faamatalaga lau Afioga, i sui o nuu. O le sui o le nuu, o lo o aiaia i lalo i lona tofiga, i lalo o le Tulafono o Mataupu o le Lotoifale. O lo o faapea, mai lalo o le Tulafono, e filifili mai e le fono a alii ma faipule o nuu. A oo foi ina faamuta le tofiga e logo foi le nuu, i alii ma faipule. O le tausaga na tea nei, 2019 na tuuina atu ai ia i latou uma kopi o a latou matafaioi e fai. Sa matauina lea vaega lau Afioga i le taimi o le matou mafutaga ma le Matagaluega. Atonu e tasi lea vaega, o lea sa fesetai ai sui o nuu, ona e le o maoti lelei. O isi foi sui o nuu e fou mai, latou te le maua uma a latou matafaioi ma galuega e tatau ona faatino. Ma o lea la, ua uma ona saunia e le Matagaluega le booklet, le tusi laititi o lo o lisi uma ai tiute o le sui o le nuu e pei ona i lalo o le Tulafono o Lotoifale, lea e pei ona ou faailoa atu. Ae faanoanoa, ona o lo o i ai pea sui o le nuu e le o mulimuli i ia Taiala. Ua maea ona ou faamanino i sui o nuu, sui tamaitai o le nuu ma sui o le Malo. I fonotaga masina o lea e faifaipea i masina taitasi, o i latou o lo o faigaluega totogi mo le Matagaluega ma le Malo. A fai la e i ai se sui o le nuu e galue tetee i le Malo, o lona lava saolotoga lena, ae tatau ona faamavae

mai e avea ai ma sui o le nuu ona e le mafai ona faatino lea galuega tautua i le Malo, pe afai e galue faatautee i le Faigamalo. E faapea foi i sui o le Malo ma sui tamaitai o nuu, e le aiaina lou saolotoga ma lau filifiliga. Ae le mafai ona talia e le tatou Matagaluega lou galue faatautee i fuafuaga a le Malo o lo o faatino e le Matagaluega poo nisi lava fuafuaga a le Malo.

Lau Afioga i le Fofoga Fetalai, atonu ua manino lea vaega ma o le a ou see mai i sui tamaitai o nuu. O sui tamaitai o nuu, e filifili mai e komiti a tina ma tamaitai ae faamaonia e le fono a alii ma faipule, e pei ona ou faamanino atu muamua. O lea foi tofiga o lo o aiaia i lalo o le Tulafono o Mataupu tau Tina ma Tamaitai i lona teuteuga i le 2009. I le taimi nei, o lo o taumafai le tatou Matagaluega ina ia aofia uma ai tina o Samoa i totonu o komiti a tina, e le gata i nuu mavae, ae faapea foi i afioaga e le o ni nuu mavae, o lo o tu taulata i le taulaga.

E momoli atu le faafetai tele ia i latou o komiti a tina, o lo o ua maopoopo ma o lo o ua galulue nei. E le gata i le soifua maloloina, ma le tumama o o tatou nuu, ae faapea foi i faatoaga ma togalaauaina, aemaise foi o le ie Samoa ma le faaititia o sauaga e faasaga i tina ma fanau. E tele lava le tatou sao i taumafaiga a lo tatou Malo mo le manuia lautele o si o tatou atunuu, pe afai, tatou te galulue faatasi. Ia manuia tele faamoemoega o lenei tausaga.

Lau Afioga i le Fofoga Fetalai, o le toe Fono lenei, o lenei Paeaiga, ma e pei lava foi ona taumafai atu nisi o sui usufono mamalu o lenei Maota, ua faapea foi se lagona. E tatau lava ona faaleo le agaga o le faafetai ma le faamalo. Lau Afioga i le Fofoga Fetalai, Leaupepe Toleafoa Faafisi, ou te le selu atu pe faaviivii atu i lau Afioga, ae ua le mafai ona taotaomia le loto faafetai ma le faamalo. O le toa-tolu ai lea i lau Afioga o Fofoga Fetalai, ua nofoia le Nofoa lena, talu mai ona avea au ma sui usufono i lenei 20 tausaga. E maoae lava lou tulai mai i le tauaveina o le tiute o le Fofoga Fetalai, aemaise ai lava o le faafoeina o le Fonousu a Samoa.

E tasi le Paeaiga sa ta itumalo faatasi ai, ma e ui lava ina ua vaeluaina lo ta itumalo faapalota, ae o taua lava o le itumalo e tasi. Aua o lau Afioga foi o le Apulu, o le paia i le Faletolu, i le tatou nuu o Faleasiu. O le ala foi lea, o lota mitamita ma faafetai. Ua tele foi aso o matauina e le atoatoa lou malosi i le tino, ae e te le o faavaivai lava e tusa o lou valaaauina. E faamalo le toa, faafetai finau, o lea o le a ta malolo faatasi. Atonu e sau se aso ou savalivali atu ta te eva ma fai se ta pele suipi. Ia agalelei le Atua, faafualoa lou soifua ma saga foai le manuia i lau Afioga.

Lau Afioga i le Palemia, Tuilaepa Fatialofa Auelua Neioti Aiono Galumalemana Dr. Sailele Malielegaoi, e ui ina o lo o totoe pea aso o le tatou mafutaga faale-Kapeneta, ae fia faamauina se upu aua le faafofoga ma le tapuaiga a Samoa. E le mafai e se malosi o se upu o le tatou gagana ona faamatala le maualuga, le loloto, o le lagona faafetai i lou tulai mai e avea ma Taitai o le Malo Tutoatasi o Samoa. Ua tatau i so o se Samoa ona i ai lea lagona faafetai, ona o lau taitaiga ma le meaalofa a le Atua ua ia te oe, ua

manuia ai Samoa. O lele ua tafe potopotoi mai ma fua taufuifui mai manuia, ma le tamaoaiga mo Samoa ona o lau taitaiga, au galuega, lau tofa ma le utaga mamaao. E faafetai i lau faaea i lenei itumalo ma sou nei tagata faatauvaa. Ia faaifo mai lagi manu ma faamanuiaga mo lau Afioga, le tapuaiga a le faletua ia Gillian, faapea lou aiga. E faafetai o lo o maua pea lou malosi e faaauau ai lau taitaiga o Samoa. O upu a le atunu, e fili lava i le tai le tautai ma e le toe faailoina o lau Afioga lava o le tautai matapalapala. Ia sagai ane ai o le tai aua le faiga palota ma le faaaauauina o le taitaiina o le Malo o Samoa i lena Paeaiga fou ua tatou agai atu nei i ai. O ou mama na.

Le mamalu e o lenei Maota, le mamalu o sui usufono filifilia uma o le Palemene, o lenei Paeaiga Lona XVI, Afioga i Minisita o le Kapaneta, faapea le mamalu o sui usufono uma o le Palemene. O i tatou lava o siufogoa mo tatou itumalo e faaleoina manaoga ma atinae aua le manuia auluma o Samoa faapea foi o tatou itumalo na filifilia maia i tatou. Ua malo le fai o le faiva. O le faafetai a lenei Matagaluega ona o la outou tuualalo, la outou fautuaga aua le faaleleia atili o le auaunaga a lenei Matagaluega. O le a se taumafaiga ua oo i ai le malosi o le tatou Matagaluega, faapea seleni ua mafai na faamatuu mai e lo tatou Malo, matou te talitonu, e le mafai ona faamalieina ai nisi o manaoga na tuuina mai. O a ni vaivaiga ma ni faaletonu o le Matagaluega ua outou matauina i lenei Nofoaga, avea ia lea o se laasaga o le fasitepu e agai ai i luga le auaunaga a le Matagaluega i le lumanai. Aua e pei lava ona saunoa le Taitai o le Maota, e le i faia Roma i se aso e tasi. O ni faaletonu foi o lenei Matagaluega ua matauina e le Kapaneta ma le Palemene, o le matou tatalo faatasi ma le Ofisa sili o Pulega o le Matagaluega ma le auaunaga faapea le aufaigaluega uma, ia ufiufi a manu gase i lau tofa faatupu ma lau silasila i le Atua ma Lana talalelei. Ia manuia tele lo outou alo atu mo le faiga filifiliga a lo tatou atunu.

O nisi foi o uso a sui usufono o le a le toe filifilia e itumalo mo lena Paeaiga fou, e le uma ai aso o le Alii, e toe oso foi le la. Mo nai ou uso a faipule o lea o le a matou malolo faatasi, ua faamalo le toa. Amuia i tatou ua tatou faia se filifiliga e aupito sili ona faigata ma tatou manumalo ai. E moni ai upu a le Tusi, “E na o le toa lava e mafai ona ia pulea lona loto.” Ia manuia tele le tatou tapuaiga mo le palota o lo o alo atu i ai lo tatou atunu. O le toe pale mai foi o le HRPP, o lo tatou manumalo foi lea. O le a tatou taumavae ma le malie o le loto i lo latou galulue faatasi ai i lenei Paeaiga. Ia saga faaopoopoaina e le Atua lo outou malosi ma le atamai e faaauau ai pea le tautua mo Samoa i so o se auala ua finagalo i ai le Alii.

Lau Afioga i le Fofoga Fetalai, e le galo ta e o i Atua. Ia avea ia lenei avanoa ou te faailoa ai lou agaga faafetai i le Afioga i le Minisita Lagolago o le Matagaluega o Tina ma Tamaitai, Atinae o Afioaga ma Agafesootai, le Afioga ia Salausa Dr. John Ah Ching. E faafetai tele i lau Afioga Salausa, o lou uso a Minisita, o lou uso a faipule, o lou uso a fomai. E i ai foi le ta fesootaiga i lo ta nuu o Lepea. E le mafai ona faamatalaina le taua ma le

faamaoni o lau lagolago mai ia te au ma le tauaveina o le ta galuega fai faatasi aua ia Matagaluega sa totofi i ai i taua. E le gata i le Matagaluega o le Soifua Maloloina mo le 3 tausaga, ae faapea foi i lenei Matagaluega ua ta i ai mo lenei 2 tausaga. Sa o ta galulue ai i le Matagaluega o Tina ma Tamaitai, Atinae o Afioaga ma Agafesootai. O le a ou tapuai ma tatalo mo lou toe tulai mai i le isi Paeaiga o alo atu i ai lo tatou atunu. O au lava galuega lelei, e fua mai ma e te selesele lava foi oe i ai. O le Atua o lo o i ai le taui o a tatou galuega. Ia manuia tele lou alo atu mo le isi faiga filifiliga a Samoa.

Lau Afioga i le Fofoga Fatalai, e le faagaloina foi se faafetai i le Ofisa Sili o Pulega o le Matagaluega, ma le aufaigaluega o lo o tautua mo le soifua maloloina mo le 3 tausaga foi o lenei Paeaiga, sa o matou galulue faatasi ai. Faamalo le tautua, faafetai mo lo outou lagolago i taimi sa tatou aleaga faatasi ai, aua le soifua maloloina o le tatou atunu. Ia ae faasili so matou leo i lenei taimi, o se faafetai lea i le Tamaitai Ofisa Sili o Pulega, ia faapea Ofisa Sili Lagolago ma le lautele o le matou Matagaluega o Tina ma Tamaitai, Atinae o Afioaga ma Agafesootai.

Faamalo i lau Afioga i le Tamaitai Pule, ua matauina lava le matagofie o le tatou galulue faatasi, galulue felagolagomai, leai se faaletonu na matauina e na o le galulue fiafia ma galulue punouai, aua le tulimataiina o a tatou matafaioi faapea faamoemoega ma le faatuatuaga o le tatou Malo, o lea ua lalafo mai i ou tauau faapea le Matagaluega. Faamalo faafetai i la outou tautua. Ia agalelei le Atua, ia faafouina pea ma faatupuina pea lo outou malosi, faapea le tomai aua le faatinoina o matafaioi ua valaaufina i ai a outou afioga.

Lau Afioga i le Fofoga Fatalai, muaau ia ma tumua, ae faamuli ma se alii so matou leo, ae se i ou afe ane aua le tapuaiga a si ou itumalo o Aana Alofi Nu.1. O le paia lava lea aua Aiga Sa Tuala, Aiga o Mavaega, Aiga Taulagi, Alo o Tuiaana Tamalelagi, Afio le Tamaaitu ma le Maugafa, faapea foi le afio o Galumalemana le Aloalii ma le mamalu ia te oe le Faletolu ma Fuaifale. Ua api le uli, ua sina foi le galu. Ua faaifo i le tuasivi faiva o le manusina, ae ua faaifo foi i fanua tuliga na i le tuasivi. O le a faaifo nai le naaloa le tuamafafilimalae, ua gase foi le galu i paa. Lou itumalo e, e maualuga lau faaaloalo lea ua ou tulai mai ai i le 5 tausaga o lenei Paeaiga ua tau faaiui nei. O lau faafetai e mai i le taele o lou fatu. O lau tapuaiga na ala ai ona manuia faiva, ma amanaia le Nofoa o le ta itumalo, e le gata i le Palemene, ae ua faapea foi i le Kabeneta. Amuia lo tatou itumalo, o se faaaloalo ina maualuga. O ai na manatu o le a sii le fale o Asomua i le mauga. O nei faamanuiaga e le ona o au, ae ona o le moni o la outou tapuaiga ma le mana o a outou tatalo. Faafetai, faafetai tele i lou itumalo, lou nuu pele o Faleasiu.

O le a ea se fua o la outou faaaloalo maualuga? Tofa malie ia lo tatou nuu ona ua pau o se mea ua oo i ai le taumafaiga a la outou auauna. O lena ua

faasopolia pitonuu o le tatou nuu i auala galue. Ou te le tau faailoa atu, o tatou auala galue. O le taimi nei, o lo o tapisa lava, ma tagi mai le tele o itumalo i ni auala galue, ae ua leva ona faasopolia uma pitonuu e 4, o le tatou nuu i auala galue. Ma o lena foi, ua amata ona afaina nisi o tatou auala galue, ona o le faaletonu o nisi o pitonuu i le tausia lelei o ia foi faamanuiaga. E tusa ma le \$1.5 miliona le tupe a lo tatou Malo, sa faaalu i le fausia o ia auala galue.

Ua maea foi, ona faaleleia tatou vaitaele. Ua loa foi aso o alalaga fiafia si o tatou nuu i le toe faaleleia o o tatou vaitaele faale-natura. Ma e le laitiiti foi se seleni a lo tatou Malo na faatino ai ia galuega. E lata foi i le \$100,000 le vaegatupe sa faaalu i nei galuega.

O lea foi ua lelei o tatou faleaoga ma le tatou malae taaalo. E tele tausaga o feomai a tatou fanau i le tatou faleaoga i Sapulu. Lamatia foi le saogalemu o nai fanau iti i luga o le alatele a le Malo i le tausavali mai i Tauao ma Moamoa agai atu i le aoga e tasi sa i Sapulu. O lea la, ua 2 tatou faleaoga tulagalua o le tasi i Sapulu ma le tasi i Moamoa. O lea faatoa tuanai atu nei, le umusaina o nisi o potu faaopoopo o le faleaoga i Sapulu. O le taimi nei, ua faatumulia foi ia faleaoga uma e 2, ona o le faatupulaia pea o tupulaga aoaoina o lo tatou nuu. O le taimi nei, o le aoga i Sapulu e 514 tamaiti aoga, aoga i Moamoa 402 tamaiti aoga, ae 9 faiaoga. A faaopoopo la i ai ma le tatou malae taaalo, lea ua tapuvae tasi nei i ai koleniga o autaaalo a lo tatou nuu, ona tulai mai lea o se vaegatupe e tele, e tusa ma le \$1.5 miliona sa faaaluina foi mo ia atinæ taua, aua le manuia lautele o le tatou nuu.

Ua tatou inu foi i vai mama, magalo ma le saogalemu. E le o toe po se lilo i le tausaga, i le tele o tausaga o mafatiaga sa feagai ma lo tatou nuu, aemaise lava le mamalu o lo tatou nuu o lo o ee ma papaaao i o tatou laufanua i uta o Faleasiu Uta, ona o le tulaga faigata sa i ai le suavai mo le taumafa ma le faaaaogaina mo aso faifaipea o le soifuaga. Umi tele se taimi sa taumafai ai lenei faamoemoe. Ma na amata mai lava lea taumafaiga i le tau faauiuga o le Paeaiga talu ai.

O se luitau tele lea sa feagai ma le Pulega o le Suavai, ona sa taumafai lava e vili lenei vai i se mamao i uta e gafatia e le masini vilivai. Ma ona pau lea o le maualalo e gafatia e le masini vilivai, e na o le 200 mita lea na vili ai loa le vai. Ae peitai, e le i ausia ai lava le faamoemoega, ia oo le vai i uta i le mamalu o le nuu, o i gauta atu o le mamao ua vili ai le vai. O lea na fausia ai loa le tanevai i uta, e pamu atu i ai le suavai ma le vaega sa vili ai le vai, ma mafai ai loa ona toe faasoa mai le suavai i aiga uma o Faleasiu, o lo o nofoia laufanua i uta atu o le vaega na vili ai le vai, faapea foi ma se vaega o Fasitouta i Lepale. O le tau atoa o lenei galuega e oo mai i le aso, \$7.12 miliona tala.

O lea foi ua faagasolo le faaleleia o le tatou auala i Sapulu. O lo o faagasolo i le taimi nei le auala i Sapulu ma o se galuega e le taugofie. E \$2.3 miliona tala le tau o lenei galuega tele. Ma e tele ma anoanoai faamanuiaga, o le a

maua e i latou o lo o nofoia tafaala o lenei auala, faapea foi si o tatou nuu o lo o affio ma papaaao i Faleasiu-uta. O le aofaiga o le tupe faaalu a lo tatou Malo i nei atinae, e tusa lea ma le \$15 miliona tala.

Le tatou itumalo e, e le itiiti lea faamanuiaga. Le mamalu e o le tatou itumalo, o le agaga o lou tolaulauina o nei galuega, e le ona o se viiga mo la outou sui usufono, ae ina ia ave le faafetai e tatau ai i lo tatou Malo, ona o lana faasoa amiontonu o le tamaoaiga o Samoa, ma lona amanaia ma tali mai i le faamalieina o nisi o ni o tatou manaoga sa faaleoina ma le faatuanau. O le faamaoniga lena, o le maopoopoga ma Faigamalo lelei a le HRPP. Ma o lou mitamitaga tele lea i le avea ai o lou nei sui usufono ma itutino auai o lenei Vaega Faaupufai.

E 49 isi itumalo o lo o i ai manaoga, e pei foi o le tatou itumalo. Ma e fua foi le tali atu a le Malo, i le tamaoaiga o lo o mafai ona faamaopoopo mai, i lea taimi ma lea taimi. Lou itumalo pele, si ou nuu o Faleasiu, e le uma le fia galue ma tautua mo oe. Ae peitai, ua matauina foi le naunau mai o nisi o tamalii o le tatou itumalo ma lo tatou nuu e fia tautua foi latou. Ma e toatele e agavaa i le tauaveina o le tofi o lo tatou itumalo.

Ou te faatauaina tele le tatou fono i Vaifo mo le tapenaga o le tatou palota talu ai. Sa ou faaali manino lava ma le faamaoni ona o le toe pau lea o le Paeaiga ou te tauva ai mo le tofi. O le talitonuga, e i ai e faalele, e i ai foi e matau. E pala le maa ae le pala le upu. O le upu a le atunu, o le aso ma le filiga o le aso foi ma le mataigatila. Sagai ane ia ai o le tai, ia fili i le tai se agavaa. Ia faatupu ou faiva, ma fai malu lau faatofalaiga. O le toe manao a la outou sui usufono o le a malolo, ia ua na o se tagi lava a le pumate. Lo tatou itumalo, ia o tatou lagolago le Faigamalo ua faamaonia le manuia ai o Samoa i pulega lelei ma mea ua faatino, ma ua faamaonia le manuia ai o lo tatou atunu, ma ua faapea foi ona manuia ai lo tatou nuu. Ia faamanuia mai le Atua i le tatou faiga filifiliga. Faafetai i la outou pule ma la outou lagolago i le 10 tausaga sa ou tauaveina ai ma nofoia le nofoa o le itumalo. E manatua pule ae le manatua faalaeo. Faamagalo ni ou vaivaiga. O upu lava a le atunu, e poto le tautai ae le atoa ia i le liu o lona sa.

Lau Afioga i le Fofoga Fetalai, ia faaiu atu ia se tala ou te faafetai ai i le lagolago ma le faamaoni ma le alofa o si ou toalua ma si au fanau i Niu Sila, Ausetalia ma Amerika faapea foi i Samoa nei. Faafetai i la outou lagolago ma le faamaoni o lo outou alofa. E faapea foi lau faafetai i ou aiga uma i Samoa nei ma atunu i fafo, mo la outou lagolago mo au i nei tausaga e tele, taui atu e le Atua lo outou agalelei.

Ia lau Afioga i le Fofoga Fetalai, o le a sau silasila ma sau matau i se tu, se aga ua le tautamalii i totonu o le Maota Fono o Samoa, tatalo tau ia faamagalo le sui usufono nei. Ou uso a Minisita, ou uso a sui usufono o lenei Maota, faamagalo ni faaletonu o le sui usufono o Faleasiu po o Aana Nu.1 i la outou tofa faale-Atua.

Soifua ma ia manuia.

Na faaalia le agaga fiafia o le Maota i le patipati o latou aao i le maea ai o le saunoaga a le Minisita mo Tina ma Tamaitai, Atinae o Nuu ma Afioaga ma Agafesootia.

FOFOGA FETALAI: Ia ua faamalo faafetai, ua faafogoga le Palemene, ua faafogoga foi le atunuu o Samoa ia aemaise foi le itumalo o Aana Alofi Nu.1 i le afioaga o Faleasiu. Ia le paia i Aiga, Faletolu ma Fuaifale i le saunoaga matagofie ma le saunoaga faamavae a le Afioga i le Minisita, le Afioga i le Alo o Tamaalelagi o Tuitama.

Ia malo le saunoa, malo malele ua taliga lava e fia faalogologo i saunoaga a toeaiina ua leai se vailiu ua le oo i ai, malo faafetai. E faafogoga malie le itumalo i le saunoaga, ia e faapena foi ona malie le faalogologo a le Palemene. Ia o le matou foi tatalo ia alofa le Atua faaifo mai i lagi manu aua lou soifua galue i nisi tiute ma faiva o lo o totoe, ia agalelei le Atua ma faapena ona leoleo, puipui ma faataunu.

Ia faamanuia le Atua i lenei aso, ia aemaise foi o le saunoaga faa-Minisita ia ua manino matagofie le faafogoga a Samoa ma le Palemene, i mea sa laga e sui usufono mamalu e fesiligia ai le galuega ma matafaioi a le Matagaluega o Tina ma Tamaitai. Malo faafetai. Ia o le matou tala faaopoopo lea, o a foi ni lapē o le tatou Palemene, ia foi ia i nuu le aina, faamagalo le tatou nonofo ai. E tetele lava i Pesega, ia e talitonu e matua lava i nuu lelei ma le finagalo o le Atua.

Ia masalo o lea o le a tuu atu i le Minisita o Leipa ia ae faapea foi Fefaatauaiga ia ma Pisinisi ma Alamanuia. Ia lau Afioga Lautafi lau Afioga i le Minisita, ia tulai maia e saunoa ma malele e tusa ai i mea sa laga e sui usufono mamalu i le tatou Fonotaga.

Afioga Hon LAUTAFI FIO SELAFI PURCELL (Minisita mo Pisinisi, Alamanuia ma Leipa): Faafetai i lau Afioga i le Fofoga Fetalai. Sa ou faapea ai a tatou malolo i le maea ai o le lauga matagofie a si ou uso a Minisita. Ia e leai lava se isi e fai loto, e pule lava lau Afioga.

Ia ae le i faia se tala e muamua pea ona faatulou i le paia o le Maota. Afio o lau Afioga i le Fofoga Fetalai, afio lau Afioga i le Palemia, ia faapea le mamalu o Minisita o le Kapaneta. Afifio Minisita Lagolago, tuu atu i lena itu o Taitai Komiti o tatou Komiti Faa-Palemene, afifio o sui usufono uma o le tatou Maota nei.

Ia e faatulou atu foi i le Ofisa o le Fono o lo o latou lagolagoina le tatou Fono mulimuli ma Fono uma ua mavae. Ia faatulou atu i le afifio o Ofisa Sili o Pulega o Matagaluega, o latou o lo o vae ma lima i ai lo tatou Malo. Faamalo le tautua nuu.

Ia ee ia la i tialogo ma sausau i paepae folasa paia o le taeao. Ua taoto foi faai'a o tai loloto mamalu o le aso, aua o paia ma mamalu ia e ao i le Atua. Afio ia lau Afioga i Le Ao o le tatou Malo, lau Afioga Tuiaana Vaaletoa

Sualauvi II ma lau Masiofo. Afio lau Afioga i le Sui o le Fono a Sui Tofia lau Afioga Le Mamea Tuiletufuga Ropati Mualia ma lou faletua.

Tulouna Tiafau nei, o le malae o le Malo, o le malae o le faalelegafulu, malae o le tagatia, malae o le faautugatagi a Samoa. O lo o pofala foi le tapuaiga a paia o le Talalelei i fatafaitaaulaga e fia, o lo o nonomanu i totonu o Samoa, aua se manuia o Samoa ma ona tagata.

Faatulou foi i le Ofisa o Faamasinoga, le afio o le Faamasino Sili, o le Peresetene ma le mamalu o alii ma tamaitai Faamasino. E le faagaloina foi le tapuaiga mai maota ma laoa, paia o Aiga o Tupu, Aiga o Nofo, Aiga o Papa. O Aiga sa tu tafaitoa, o aiga sa tufaletia, ae o lo o siva taufao foi usoga a Tumua ma Pule, Ituau ma Alataua, Aiga i le Tai ma le Vaa o Fonoti.

Ou te le faasopolia foi le tapuaiga mamalu o le Fale Tutuila ma Fale Tuimanua. Afio o le Kovana Sili ma lau Masiofo, afio o le Peresetene, Fofoga Fetalai o Maota e Lua. O paia ia aua Sua ma le Vaifanua, Fofo ma Aitulagi, Saole ma Saleaaumua ma le mamalu i le Launiu na Saelua. Afio foi lau Afioga i le Laau na Amotasi, Faatuolemotu, Auvaaa o Tootoo o le Faleula, ia ma upu ia oe le Manuatele.

O paia na o Samoa, a tafa ai le malama i Saua, ona mumu lea o le moli i Analega fale o le tamaitai o le Alataua na ia valoia manu o Samoa. A lea ua o tatou sapi ai nei i le malamalamama o le Talalelei? Tulouna, tulouna lava. See laia i o outou tia maualuluga ma outou paepae le gae, ma nuunuu atu faatini o tausala paia ia, aua o paia ua oooo tutu lava i Tiafau nei.

Ae se i ou oo ane lava i si ou itumalo o Satupaitea, aua le Susu o Asiata le Vaimalae, o Oe na Falefa i ai Tumua, ona o lau tausivaatele. Susu le Aiga Samoelieoi o le Aiga na muaimalae i Aiga o Samoa. Susu Tupai o le vaatiu o Nafanua, Afifio Alo o Lilomaiaava aua Faanana ma Tuimaseve. Tulou le Aiga Savalomua, ia ma le Suafa o le Fauatea. Afifio Tapaaufanua o Tonumaipea o le ao o Salafai. Alaalatai le paia ia te oe o le mamalu o aiga i le Alataua, Tapaaulefano, Nofo a Pule, ma le Matuafia. Tainane foi le tapuaiga mamalu a faletua ma tausi, saoao, le malosi o le tatou itumalo, ia ae tainane fanau lalovaaoa o le lumanai o si o tatou itumalo. Faatulou i le tapuaiga a tina ma tama matutua o le tatou itumalo.

Faatulou foi i le tapuaiga a feoi o le Talalelei o lo o galulue i totonu o Satuipatea, tatalo le ao ma le po, ia aua se manuia o si o tatou itumalo. O paia na o Satupaitea mai Malaeaoga seia paia Falepau. Faamalo tatalo si ou itumalo, faamalo tapuai. Ia tapuai maia se i fai se upu a lo outou sui usufono, i le Fono mulimuli lenei o le Paeaiga. Se i talatala ni galuega sa mafai ona fai e la outou sui usufono, aemaise o Matagaluega sa i lalo o lau vaaiga, i lena 5 tausaga.

A o le i faia la se tala a Satupaitea lau Afioga i le Fofoga Fetalai, paga lea na amata mai le tatou folauga o atoatoa le tatou auvaa. A ua oo mai i lenei itula, ia atonu ua matagitogaina le tatou folauga. Le tuua ai o le Malo i le Afioga ia Vaafusuaga Toleafoa Ken Poutoa, tau lava ina ia faataunu atu

moomooga alofa, faamaisega a lenei itumalo, i le tuua ai o le Malo i le valaau paia a le Atua, i se tasi o le tatou auvaa. Faamafanafana le Atua i le faletua ia Vaelaa ma si ona alo, aiga na lua, ia aemaise foi le itumalo.

E faapena foi se agaga i le tatou uso ia Lealailepule, ia ona o le valaau paia a le Atua i le tina. Amuia oe Lealailepule ua iu lava lau tausi i si ou tina. Ai foi o le mea lena e te manuia ai.

Ia lau Afioga i le Fofoga Fetalai, o le a oo sina au faamatalaga, i ni mataupu sa laga. Ae e le tele foi ni mataupu lau Afioga. O nai mataupu foi sa... pe na o le 2 ea mataupu na o matou faamalamalama i le taimi sa tulai mai ai, ia po o nisi foi aso na sosoo mai ai, sa saausi ai foi i saunoaga a le Palemia, i nisi foi o nei mataupu ma faamalamalama atili. Ae o le a ou talanoa pea i auga o Matagaluega, lea e i lalo o lau vaaiga, ia ma aofai atoa atu ai ma faamalamalamaga o na foi mataupu.

O le a ou amata atu la i le Matagaluega. E 9 Matagaluega lau Afioga o lea ou te vaaia sao lava i le taimi lenei atoa ma isi foi o tiute. O le a ou amata atu la i le Matagaluega o Taui o Faalavelave Faafuasei ia po o le ACC Corporation. Atonu e le toe po ma se laina le mafuaaga a le Malo na faatu ai lenei Matagaluega. O le anavatau a le Matagaluega lenei, ina ia faaitiitia le aafia i so o se ituaiga tu ma le soifuaga i Samoa o i latou e aafia i faalavelave faafuasei. O Tulafono o lo o faagaoioi ai le Matagaluega, o le Tulafono o Taui o Faalavelave Faafuasei 1989, o le Tulafono o Faalapotopotoga Tumaoti 2001, ia, ma le Tulafono o le Pulega o Tupe po o le Public Finance Management Act 2001 ma le Tulafono o Leipa 2013.

O le faatupeina o lenei Matagaluega e pei ona silafia, e lelei pea le tau atu ina ia malamalama pea le atunu o lo o faafogafoga mai. Aua o le tele o galuega a le Matagaluega lenei, e faale o manino i ai le lautele o le atunu. O tupe ia e faatino ai, lea e faagaoioi ai le teugatupe lenei, ia o tupe a tagata faigaluega. E aumai le sene mai le tagata faigaluega ma le sene mai le tagata o lo o ona le galuega e teu i totonu o le fund lea, atoa ai ma lafoga po o le levy e maua mai le penisini, e 5 sene i le kalone. O tupe la na e ao mai, lea la e teu faafaigaluega e le Matagaluega lenei, ia lava pea se seleni a tulai mai se taui mo ē e aafia i faalavelave faafuasei, a o la e i ai le seleni e tua i ai. E tasi lea matafaioi a le Matagaluega, ia vave ona maua taui mo i latou e aafia i faalavelave faafuasei i galuega po o latou aiga.

O le tasi o matafaioi tele a le Matagaluega lenei, ia vave ona toe faafoia le malosi o i latou o aafia, ia vave ona toe foi le olaga i se olaga e pei ona masani ai. Rehabilitation o tagata nei, ia vave ona toe manuia ma mafai ona toe foi o latou olaga i se olaga e pei ona masani ai. O tupe la nei e i totonu o le Matagaluega lenei, ia, e fesoasoani mai foi i le Malo i ana fuafuaga fai.

O tupe teu faafaigaluega. E pei la ona i ai investments, lea a faalogo ai le mamalu o le atunu, o la e ua faatau le fale. E pei o le tausaga lea na faatau ai le fale lea o le Cold Star lea e i autafa i i, i talaane ifo lava o le fale o le ACC. Ia, fai le tatou maketi lea e i i i Savalalo. Ioe. O le tatou faata i le

falemai, tasi lena vaega sa faatupe atu e le ACC aua le soifua maloloina o tagata. O le fausia o le tatou fale mo le tatou Amepasa i Ausetalia. E tasi lena vaegatupe, o la e teu faafaigaluega ai e le Matagaluega lenei tupe ia o lo o pulea e latou. Ia atoa ai ma isi foi tulaga o lea ua tilotilo i ai le Matagaluega, lea e faagaoioi ai ma faafaigaluega ai le tupe lenei.

O le tilotilo atu i le 5 tausaga lea ua tea nei, e manino lava le faaitiitia o i latou o lo o aafia i faalavelave faafuasei, e alualu pea i lalo le pasene o i latou mai lea tausaga i lea tausaga. O se molimau mautinoa lena o lo o lelei le faatinoina o galuega ia e galulue faatasi ai le Matagaluega o Taui mo Faalavelave Faafuasei ma le Matagaluega o le Soifua Maloloina, Matagaluega o le FESA, ia ma isi Matagaluega o lo o galulue faatasi ina ia faaitiitia avanoa e aafia ai o tatou tagata i ni faalavelave faafuasei. Fai o aoaoga, fai a latou toleniga, ia i ai nisi i totonu o Matagaluega e faapitoa lava i tulaga ia o le koleni o le aufaigaluega, ia latou iloa mea e o i ai pe a tupu se faalavelave, ia iloa mea e fai i totonu o le aiga ia aua ne i tupu ni avanoa pe faatupulaia ni avanoa e aafia ai se tasi i ni faalavelave faafuasei. O mea lava ia e pei e faamulimuli ia i tatou. O atu i le fale o la e taatitia solo meataalo a tamaiti ma isi lava mau mea. E pei e manatu mama i ai. Ae o mea na e tutupu ai faalavelave e ono aafia ai le olaga atoa o le tagata. E tu atu le vae ae see, o tulaga uma faapena. O mea la na e fai aoaoga ina ia tatou... always be conscious, o mea e ono tutupu ai faalavelave faafuasei. O tulaga uma ia o lo o galulue ai le tatou Matagaluega. O le alualu pea la i lalo, faataitaiga, o le tausaga lea na tea nei, e 40% na faaitiitia ai le numera o aafiaga mai faalavelave mea i tau transportation, mo taavale foi nei feoai, 40%. E 6% na faaitiitia ai le numera o e maliliu mai le tulaga lea o taavale ma tulaga tau femalagaiga. E 24% na faaitiitia ai le numera o faalavelave tau galuega – work related actions pe a fuafua atu i le isi tausaga. E 41% na faaitiitia ai manuaga o tagata faigaluega ina ua uma le galuega. O lona uiga, o aiga ia ua o i ai. O lea la ua aliali mai, ua mataitu e tagata faigaluega auala e ono faaitiitia ai lo latou aafia i ni faalavelave faafuasei.

O faamaumauga nei e taua, o faamaumauga nei e taua, aua e faaosofia ai le manao pea e fai pea mea lelei nei pe a tatou o ese atu fale faigaluega. E oo foi i taimi o lo o tatou galulue ai, ia silasila totoa po o lelei le siosiomaga lea e te galue ai, pe i ai se mea e te ono lavea ai e palasi atu i lalo. E vave lava le tupu a le faalavelave. Toe emo ae foi le ata, ia ua e aafia i lou olaga atoa. O tulaga ia... O mea la nei o faamaumauga nei, e taua tele i le faalogologo i ai o tagata, i latou nei e faigaluega ina ia faatupulaia ai pea le naunau ia tuu pea i lalo nei ituaiga pasene. Ia oo foi i lea tausaga ua toe alu foi i lalo. Aua o tausaga uma lea ou te fai atu ai, mai le 2016 tau mai i le tausaga na tea nei, e alu lava i lalo. O lona uiga, things are working. O lea e maua results, speak for themselves, lea e alu i lalo.

I le tulai mai o tatou tagata ia e aafia ma o i mea nei o wheel chairs, lea foi na faatau mai le taavale faapitoa lava. Ou te iloa le taavale lenei toeitiiti lava

oo i le miliona lona tau, na aumai lava e le Matagaluega ia fesoasoani e feaveai ai latou nei e o e fai a latou faamalositino faapitoa, rehabilitation programmes, ina ia mafai ona toe faaleleia o latou tino ua lavevea, ia mafai ona savavali, se i tulou. O le mea lena na aumai faapitoa ai le 79 tagata o lea na aafia i faalavelave faafuasei nei, lea e manaomia se taavale faapena. O le mea sa i ai, e tau tuu nai tagata i totonu o taavale laiti foi ia. O lea la ua i ai le taavale faapitoa e feaveai ai i latou nei.

I le tulai mai o le tausaga na tea nei, sa tele lava le lagolago foi a le Matagaluega lenei i le tatou au taaalo o le South Pacific Games, aemaise lava le feaveaiga o i latou nei sa omai foi lea e manaomia fesoasoani faapitoa. O le tatou Matagaluega foi lenei na ave i ai le taavale faapitoa e feoai ai tatou disable athletes lea na i ai.

O le tulai mai o le Koviti, ia sa manaomia e le Malo le fesoasoani, e \$10 miliona na ave i ai e le ACC, toe ave i ai ma le isi \$2 miliona e fesoasoani ina ia lava le faasoa a le Minisita o Tupe ma le Matagaluega, e fai ai le fesoasoani lea na fai i o tatou tagata. Atoa ai ma le fesoasoani i tagata uma ia latou te lisiina le maketi ma faasafua uma latou totogi i le totogiina o latou poloka, ia ma le 4 ea masina e nofofua ai e faatau fua a latou oloa, ona o le fesoasoani lea. A faatupe atoa le mea lena, toeitiiti oo i le \$4 miliona. E tele la le sao o lenei foi Matagaluega i fesoasoani a le Malo. O le a foi se finagalo o le Malo i se isi fesoasoani o i luma, ia e tuusauni lava le ACC e fesoasoani i le mea e gata ai le fesoasoani. O la e foi ua i ai le fuafuaga a le Matagaluega e faatu le tatou Ofisa fou i Savaii. Ua uma ona faamatuu mai le lisi mai le SLC i i i le mea lea e i ai le tatou taulaga, o lena lea o le a oo atu i ai le faasologa o galuega a le ACC po o lea tausaga, po o le tausaga nei e faatu ai se tatou Ofisa ina ia faigofie ia i latou i Savaii ona o ae e fai ai a latou mataupu, e le tau afifio mai i Apia nei. Ia, atonu o lo o galue lava le tatou Matagaluega lea e pei o le mafuaaga na faatu ai ma lalo foi o le Tulafono o lo o galulue ai, lea e oo mai i le taimi nei o lo o lelei pea le faagasologa.

O nisi foi o le mamalu o le atunu o lo o fesiliglia pea auaunaga a lenei Matagaluega, o lo o fai atu lava faatalatalanoaga i luga o leitio po o TV foi, lea foi e uunai lava, ia silasila ma faafofoga i ai. Aua e toatele lava pei e le malamalamala po o ai ea e mafai ona maua le taui a o ai e le maua le taui. Ia o lena o le a fai le tatou Ofisa i Savaii, afifio ane i ai. A leai, vili mai le Ofisa nei e faamalamalamala atu ina ia manino auaunaga a le Malo o lo o tuu atu mo le mamalu o le atunu.

Lau Afioga i le Fofoga Fetalai, ona ou see mai lea i le Matagaluega lea o lo o pulea taaloga tau tupe. E tasi foi lenei Matagaluega, o le Faalapotopotoga lea, e le o se Faalapotopotoga tele, ae na faatu foi e le Malo ina ia latou puleaina le faagaoioiga o mea nei o taaloga tau tupe ona ua silasila atu le Malo, ua tele lava taaloga nei. Ua le gata i Apia nei, ae ua faasafua atu lava i tua, aemaise mea nei o bingo ma tulaga uma faapena. Ia, o lea la na faatu ai loa lenei foi Matagaluega latou te vaaia faalelei ina ia aua

ne i ulufale mai i ai ni auala faasolitulafono pe ulufale mai foi i ai ni auala faa-alatua e aafia ai latou o lo o fia taaalo ma le agaga mama ma le agaga ina ia maua se seleni e faaaaoga e fai ai ni atinae. O le tasi lena matafaioi, atoa ai ma le pulega ina ua ulufale mai le Casino. Ia, o atinae lelei nei mea, o atinae lelei, ae tatau ona i ai se Matagaluega latou te vaia ia aua ne i faaluafesasi foi ma fai ai e nisi ni auala e aafia ai i latou ia pei ona ou taua.

FOFOGA FETALAI: Malo faafetai. Ia, e matau atu o lo o lava a le tapenaga a lau Afioga ae manatu e le maea mo le aso, e lelei ona se i faamaea lelei taeao. E i ai le manatu e le o toe tele, ae taua tele le saunoaga a lau Afioga. Ae faamalie atu, o oe foi o le toeaina o toeaina, ae se i faamaea taeao lau folasaga.

Ona o lea ua tatou taunu i le tatou taimi e manava ai ma siui o le tatou galuega, o le mea lea e faamalulu atu ai e faamaea le saunoaga taeao a lau Afioga i le Minisita o Pisinisi, Alamanuia ma Leipa a le Malo.

Ae talu ai ona o lea tatou te faatasi ma le faletua o le Minisita o Tina ma Tamaitai i le latou foi tapuaiga faa-tina ma faa-aiga, e manatu lava e faaila pea mo le silafia e le tatou Palemene, aemaise foi o le faafofoga mai a le atunu. O tatou faiva, e tapuaia e aiga, ioe. E faapena, aemaise foi le itumalo. Ia o lenei taeao, o lea ua logoina au o lo o tatou faatasi ma le faletua ma le nofo a alo o le Minisita o Tina ma Tamaitai.

E i ai le manatu o le Nofoa, e ao pea ona molimoli i ai se faamalo ma le agaga faafetai. Faafetai atu Tuitama, leaga o ou mamalu ou te tausia, aua le feagai ai o Tuitama o Alo o Tamaalelagi, ia ma le Apulu, o le igoa o le Faletolu ma Fuafale, o ou tafai ma ou faleupolu e faapena ona feagai ma le tausiga o le paia o aiga ma ona Tapaua. Faafetai atu i lau Afioga i le faletua, leai, e tonu lava ma sao le upu foi lea, o le mea e tu ai le tama lelei e faapena foi, o ona tua o lo o tu ai le tina e lelei. Fai mai e sili lona tau i lo le penina, ioe. Fai mai e pei o le laau foi lenei e toto i tafatafa o vaitafe, e fua mai ona tau i ona lava fuata. O le mea la lea, e momoli atu le faafetai. E leitioa foi a tu malo le Afioga i le Minisita, o se tasi o Minisita e sailimalo aua le atunu i ona tofiga faa-Minisita, ae sailimalo foi aua le itumalo a o faafofoga mai, e \$7+ miliona ua alu i le atinaega o Faleasiu. A! e pei ua tele ea tupe ua alu ia Faleasiu. Ia, e ui i lea, malo faafetai. E manatua pea ta e o i Atua i galuega. E tautala lava galuega e pei o le tulaga lena. Ae momoli atu le faafetai a le Nofoa i le faatasi mai e molimauna le toe saunoaga a le Minisita. Ia, amuia Tuitama. E faapena. Ia faamanuia pea le Atua i le faletua ma le nofo a alo ma aiga. Ae tatou te le i tolopo, ou te tapa le sui usufono mo Aleipata Itupa i Luga na te faaiuina le tatou Fonotaga i se tatalo.

Na tolopo Taualumaga a le Fono Aoao Faitulafono i le itula e 1:02 i le afiafi seia aulia le Aso Lua, 23 Fepuari 2021 i le itula e 9:00 i le taeao.